

## Diidx Xcuent Jesucrist Nani Bacuaa San Marcw

*Baluu Juan ni rutiobnis*

*(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Scree gusloj diidx xcuent Jesucrist, Xi'n Dios.

<sup>2</sup> Si'cni bacuaa toIsaías, ni gunii xtidx Dios, che räjp Dios:

Bahuii gan, guxhalä ni chanä xtidxä,  
ganidni chääni lojlu te guzucheeni xnezyujlu.

<sup>3</sup> Riejn xse' ni rbedxa' nez loj reyubijdz:

“Colyunsä'c xnezyuj Dad,  
colslüi rexnezyulajzni.”

<sup>4</sup> Biricaj Juan ni rutiobnis nez loj reyubijdzga. Räpgajcni nanabpac gusiechlajzreni, tiobnisgajceni, te jia xtojreni.

<sup>5</sup> Riädcuadiajg xhidajl reni rbäjz Judea, näjza reni rbäjz guedx Jerusalén. Dxejcti cheni ruxhobdojreni lo Dios, rustiobnis Juanreni neñ gueu Jordán.

<sup>6</sup> Xhajb Juan nacchee con guichlajd cameii, xsindoorni nacchee con guiid, niluxh gudajwni guxha't näjza dzunbäserguijxh.

<sup>7</sup> Caguluiini rebejn, räpgajcni:

—Detzä siääd tej nani sajcro loä, nani nicla di nungäj surloä, cuää xcura'chni.

<sup>8</sup> Narä abatiobnisä la'tu con nis, biädla laani guxhalni Sprit Dxaan xten Dios te cuääzni neñ lastootu. Si'c gustiobnis nani jiääd detzä la'tu.

*Batiobnis Juan Jesús**(Mt. 3:13-17; Lc. 3:21-22)*

<sup>9</sup> Dxejc, neñ redxejga, birii Jesús guedx Nasare't ni yu' Galilee. Dxej cru batiobnis Juan Jesús neñ gueu Jordán.

<sup>10</sup> Che birii Jesús neñ nis, bahuiini bixal guibaa. siäd yäjt Sprit Dxan xten Dios yej cni si'c te palom.

<sup>11</sup> Dxejcti guibaali biejn xse' te ni räjp:

—Luj najclu xi'nä ni sanälazä; rbanälazduxhälu.

*Bateed beñdxab prueb Jesús**(Mt. 4:1-11; Lc. 4:1-13)*

<sup>12</sup> Sas baxhal Sprit Dxan xten Dios Jesús lo reyu-bijdz.

<sup>13</sup> Dxejc guyu' Jesús ro'c tiuu dxej, guyu'ni cadre yu' reman. Sas gudiil beñdxab nani rnibee, nani laa Satanás, xho niujjni te nusoob Jesús xtiidxni. Dxej cru biäd reangl xten Dios, biädhuiireni.

*Gusloj Jesús xtzuunni**(Mt. 4:12-17; Lc. 4:14-15)*

<sup>14</sup> Basälreni Juan neñ latzguiib. Dxejcti huij Jesús nez Galilee, huiluini xtidx Dios.

<sup>15</sup> Dxejc räjp Jesús:

—Abidzujñ dxej, luxh yälrnibee xten Dios abidzujñ gajxh. Col siejch lajztu, colchalilajz xtidx Dios.

*Gurejdx Jesús tajp bejn ni rniaaz bäjl**(Mt. 4:18-22; Lc. 5:1-11)*

<sup>16</sup> Sasajti Jesús nez ro' nis xten Galilee, che bahuiini lo Simón näjza loj Andrés bejtz Simón. Cazälreni xquijxhrene lo nis, sa'csi rniaazrene bäjl.

<sup>17</sup> Dxejc räjp Jesús lojrene:

—Coltanajl narä, te gunä cueddxtu bejn lacuaa ni guiniaaztu bajl.

<sup>18</sup> Lagajc dxejc basa'nreni rexquijxhreni, sanätirenini.

<sup>19</sup> Dxejc gusaj Jesús sche'n, sas bahuiini loj Jacoob näj Juan, rexi'n Zebedeo. Cayunsa'creni xquijxhreni nen xcanuureni.

<sup>20</sup> Guredxgajcni guiro'preni, dxejcti laareni basa'nreni xtadreni Zebedeo nen canuu, näjza rexmosni, sanätireni Jesús.

*Te bejn nani guyu' beñdxab nen lastooni*  
(Lc. 4:31-37)

<sup>21</sup> Bidzujntireni guedx Capernaum. Dxejcru sabd, dxej ni rusilajz rexpen Israel, biu' Jesús nen guidobäz xten rexpen Israel. Dxejcti baluii Jesús rebejn ni tre' ro'c.

<sup>22</sup> Bidxelojni rebejn xtiidxni, sa'csi cagului-inireni si'cpac te ni rnibee, xhet si'c di remastr xten leiidi.

<sup>23</sup> Nen xquidobäzreni yu' te bejn yu' te beñdxab nen lastooni. Beñdxabga guredxa', räjpni:

<sup>24</sup> —Jesús, ni siäd Nazare't, ¿xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu beñdxan ni siäd lo Dios.

<sup>25</sup> Dxejcti gudidxa' Jesús lo beñdxabga, räjpni lojni:

—Basäuu ro'lu, birii nen lastoo niguiire.

<sup>26</sup> Sas beñdxabga batienguij niguiiga, luxh cabedxa'ni biriini nen lastoo niguiiga.

<sup>27</sup> Bidxejbti guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj rebeñdxab, luxh ruzoobreni xtiidxni.

28 Di niacjaa gucbee rebejn guideb nez Galilee xhi rujn Jesús.

*Basiajc Jesús xnan suegr Pedr*

*(Mt. 8:14-15; Lc. 4:38-39)*

29 Che biriireni xquidobáz rexpejn Israel, huinä Jesús Jacob näj Juan rolijz Simón näjza Andrés.

30 Luxh xnan suegr Simón naga', yu'ni xliaa. Dxejc räjpreni lo Jesús:

—Cayacxhuuni.

31 Dxejcti gubig Jesús lojni, gunaazni ñaani, guläsnini; lagajc dxejc biriini xliaa. Dxejc gusloj cayunireni.

*Xhidajl beñracxhuu basiajc Jesús che huääz gubijdx*

*(Mt. 8:16-17; Lc. 4:40-41)*

32 Che huääz gubijdx, luxh abiu' guxhijn, biädnäreni guiraa rebeñracxhuu loj Jesús, näjza renani yu' beñdxab neñ lastooni.

33 Luxh guideb guejdxga bidojp ro' yu'ga.

34 Basiajc Jesús xhidajl renani rajc garen-garen yälgujdx. Niluxh gulääzani xhidajl beñdxab, niluxh dini nusaan ninii rebeñdxabga, sa'csi najnreni chu najcni.

*Baluu Jesús nez Galilee*

*(Lc. 4:42-44)*

35 Che bara yääl, cäyru bistie Jesús, biriini sääni te laad cadro ruti bejn. Ro'c cabejdx-canabni loj Dios.

36 Dxejcti Simón näj resa'ni huitiilreni Jesús.

37 Che bidxälrenini, räjpreni lojni:

—Guiraa rebejn caguillu.

38 Dxejc räjp Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

<sup>39</sup> Dxejcru cuansaj Jesús guideb nez Galilee, caguluiini xtidx Dios nen reguidobäz xten rexepejn Israel. Gunibeezani birii rebendxab nen lastoo xhidajl rebejn.

*Basiajc Jesús te bejn ni ral tiejxhni*

*(Mt. 8:1-4; Lc. 5:12-16)*

<sup>40</sup> Gubig te benracxhuu ni ral tiejxhni loj Jesús, bazuxhijbni. Dxejcti räjpni lojni:

—Narä nanä sajc gusajclu narä palga rlajzlu.

<sup>41</sup> Balaslajz Jesús benracxhuuga, gunaazni naani, räpgajcni:

—Rlazä jiajclu. Biajc naj.

<sup>42</sup> Cheni guniini scree, biacgajc benracxhuuga.

<sup>43</sup> Dxejcti gulunejz Jesús bejnga. Per räpxgaani lojni:

<sup>44</sup> —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani räjp toMoisés gudeed bejn lo Dios si'c te seen, te gacbee rebejn abiajclu.

<sup>45</sup> Dxejc säa bejnga. Sas gusloj cayujyni diidx lo rebejn xcuent guiraa nani gujcn. Ni'cni diru niajcdi niu' Jesús nicla tej guejdx. Cansajni te laad cadro ruti bejn. Niluxh guiranejz rii rebejn, siädhuiireni Jesús.

## 2

*Basiajc Jesús te bejn ni di guniib*

*(Mt. 9:1-8; Lc. 5:17-26)*

<sup>1</sup> Che agudejd balti dxej, biusac Jesús nen guedx Capernaum. Dxejcti biejn diajg rebejn arbäjn.

<sup>2</sup> Bidopgajc xhidalduxh bejn. Gudxaj nen̄ yu'. Nicla rolä' di niajł nisiujreni. Dxejcti caguluii Jesús xtidx Dios lo rebejn.

<sup>3</sup> Dxejcti bidzujñ tajp bejn, nuureni te bejn ni digacti guiniib; siädnärenini lo Jesús.

<sup>4</sup> Luxh di niajcdi nidzujñreni cadro suga' Jesús, sa'csi yu' xhidajł bejn ro'c. Ni'c baxhalreni yejc yu' nezc cadro sujni. Dxejcru cadro baxhalreni basiäjtreni da' ni naga' beñracxhuuga lojni.

<sup>5</sup> Che bahuii Jesús rililajzreni, dxejc räjpni loj beñrachxhuuga:

—Xi'nä, agubicaj rextojllu.

<sup>6</sup> Sas gaii bejn ni ruluii leii ni sobga' ro'c bejnreni xhigab nen̄ lastooreni, naareni:

<sup>7</sup> “¿Xhicuent rnii niguiire scree? Caniyajni Dios; rut rajcdi rudzucaj dojl. ¡Dioſtis rajc rudzucaj dojl!”

<sup>8</sup> Dxejcti gucbegajc Jesús xhi xhigab cayujñreni. Dxejc räjpni lojreni:

—¿Xhicuent rujntu xhigab si'c nen̄ lastootu?

<sup>9</sup> ¿La guyasiru gäbni loj beñracxhuure: “Agubicaj rextojllu”, o la gäbni: “Huistie, cua' xta'lu, gusaj”?

<sup>10</sup> Baj ñaj, te gantu rajc rudzucaj Xi'n Dios, nani gujc Niguii, dojl lo guedxliujre, caniä loj beñracxhuure:

<sup>11</sup> —Lojlu rniä, ¡Huistie, cua' xta'lu, huij rolizlu!

<sup>12</sup> Lagajc dxejc huistie beñracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

*Gurejdx Jesús Leví*  
(Mt. 9:9-13; Lc. 5:27-32)

<sup>13</sup> Dxejcru gubisac Jesús ro' nis xten Galilee, luxh che bidoj<sub>p</sub> guiraa rebejn<sub>n</sub> lojni, baluiini xtidx Dios lojreni.

<sup>14</sup> Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn<sub>n</sub>. Dxejc räjp Jesús lojni:

—Gudanajl narä.

Sas huisuni, sanajltini Jesús.

<sup>15</sup> Dxejc sobga' Jesús cayajwni rolijz Leví. Luxh sobganäj Jesús xhidajl reni rusquijx, näjza rebe<sub>n</sub>doj<sub>l</sub> ni di chasanäj leii, näjza rexpejn<sub>n</sub>pacni, lo mex. Xhidajlreni tre', luxh sanajlreni Jesús.

<sup>16</sup> Dxejcru rebejn<sub>n</sub> ni ruluui leii näj refarisee, che bahuiireni cayaunäjni renani rusquijx näjza rebe<sub>n</sub>doj<sub>l</sub>, räjpreni loj rexpejn<sub>n</sub>pac Jesús:

—¿Xhicuent rbenäj xmastrtu reni rusquijx näj rebe<sub>n</sub>doj<sub>l</sub>, luxh raunäjnireni, ränäjnireni?

<sup>17</sup> Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquiin doctoor. Dina niädtedxä rebe<sub>n</sub>sa'c, biädtedxä rebe<sub>n</sub>doj<sub>l</sub>, te gusiech lajzreni.

*Gunabdiidxreni loj Jesús xcuent yälrucua'n  
(Mt. 9:14-17; Lc. 5:33-39)*

<sup>18</sup> Cagucua'n rexpejn<sub>n</sub> Juan näj rexpejn<sub>n</sub> refarisee, renani najc rebe<sub>n</sub>guidoo loj guedx Israel. Dxejc biääd gaii bejn<sub>n</sub> loj Jesús, gunabdiidxreni lojni räjpreni:

—¿Xhicuent cagucua'n rexpejn<sub>n</sub> Juan näj rexpejn<sub>n</sub> refarisee luxh rexpejn<sub>n</sub>paclu di gucua'n?

<sup>19</sup> Dxejcti räjp Jesús lojreni:

—¿La rucua'n rebejn ni rdon chää cadro ru' yäl\_ruchnaa che meer suga' bi'n? Che meer suga' bi'n lojreni, direni gucua'n.

<sup>20</sup> Per sidzujn dxej sibicaj bi'n lojreni, dxejc sii sucua'nreni.

<sup>21</sup> Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhi-roobruni räjs.

<sup>22</sup> Rutza rusäldi bin ni gajd guilaj neñ guidyux ni abigaa. Sa'csi bin ni gajd guilajga sutiäjzni guiidga che guilajni, luxh sinijt binga näjza guiidga. Ni'cni nanab gusälni bincoob neñ guidcoobza.

*Batojp rebejn ni rinajl Jesús triuu sabd  
(Mt. 12:1-8; Lc. 6:1-5)*

<sup>23</sup> Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu.

<sup>24</sup> Dxejc räjp refarisee, renani najc benguidoo loj guedx Israel, loj Jesús:

—Arniä, ¿xhicuent rujn rexpejn paclu dzuun ni di guchaag gunni neñ dxej ni rusilajznu, ä?

<sup>25</sup> Dxejcti räjp Jesús lojreni:

—¿La gajdtu goł nani bejn toDavid te huält, laani näj resa'ni, ä? Che biäädx xhi gauureni, gulaanreni.

<sup>26</sup> Biu' David neñ xyu' Dios cheni guyu' toAbiatar loj Dios. Abiatar sajcro loj rebixhojz ni guyu' neñ xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

<sup>27</sup> Räjpza Jesús lojreni:



—Dios bejn dxe sabd sa'csi najnni naquuinpac gusilajz bejn. Dini niujn sabd te gapda bejn.

<sup>28</sup> Ni'cni narä, Xi'n Dios ni gujc Niguii, näjza sabd rnibeä.

### 3

*Niguii ni nabidz te naani*  
(Mt. 12:9-14; Lc. 6:6-11)

<sup>1</sup> Biu' Jesús stehuält nen xquidobäz rexpejn Israel. Ro'c yu' te niguii nani nabidz te naani.

<sup>2</sup> Niluxh ro'c cagula'tz rebejn Jesús don la susiajcnj niguiiga sabd, dxej ni rusilajz rexpejn Israel, sa'csi rlanjreni cue'creni xquejni loj nani rnibee rexpen Israel.

<sup>3</sup> Dxejc räjp Jesús lo niguii nani nabidz naani:  
—Huistie, guzuj galäiire.

<sup>4</sup> Dxejcti gunabdidxgajcni loj gaii rebejn<sub>ga</sub>, räjpni:

—¿La laaca gunni dzunza'c, o la dzunguijdx, sabd, ä? ¿La suslaani yäl<sub>nabajn</sub>, o la sugu'tni?

Luxh laareni biacdxireni.

<sup>5</sup> Dxejc nadxe'ch bahuii Jesús lojreni, luxh guchuin lajn, sa'csi guc najd lajnreni. Dxejc räjp Jesús loj niguiiga:

—Baslii naalu.

Dxejcti basliini naani. Biajctini.

<sup>6</sup> Dxejcru biunejz refarisee. Guslogajceni caguchaagreni diidx con reni nadxaag Herodes, te don xho ju'treni Jesús.

*Xhidajl bejn bire' ro' nis*

<sup>7</sup> Jesús näjza rexpejn<sub>pacni</sub> sääreni ro' nis, luxh xhidajl bejn Galilee birinajlni.

<sup>8</sup> Che gojnreni redzunro ni rujn Jesús, xhidajlreni biäd. Yu'reni birii Judea, yu'reni birii guedx Jerusalén, yu'reni birii Idumea, yu'zaren birii nejj stelaad gueu Jordán, biriizaren nez guedx Tiro, näj nez guedx Sidón, biädhuiireni loj Jesús.

<sup>9</sup> Ni'cni räjp Jesús loj rexpejn pacni quuilreni te canuu, te na'c gutää rebenxhidaalgani.

<sup>10</sup> Abasiajc Jesús xhidajl benracxhuu, ni'cni guiraasi benracxhuu caxa't lojni, te canrenini te jiajcreni.

<sup>11</sup> Niluxh che rhuii rebenxhab lojni, ruzuxhibreni lojni. Dxejcti rbedxa'reni räjpreni:

—Luj najclu Xi'n Dios.

<sup>12</sup> Dxejcti Jesús gudidxa' lojreni te na'c niäjbreni chu najcni.

*Gule Jesús tzubitiop bejn loj reni rinajlni*

*(Mt. 10:1-4; Lc. 6:12-16)*

<sup>13</sup> Birii Jesús sääni lo te dajne' cadro gurejdxni renani rlajzni cueni. Gubigtireni lojni.

<sup>14</sup> Dxejcti guleni tzubitio'preni te sanäjreni laani, te guxhajnireni chaluiireni xtidx Dios;

<sup>15</sup> te ga'preni yälrnibee te gusiajcreni benracxhuu, te cuääzaren rebenxhab.

<sup>16</sup> Retzubitio'p bejn ni gule Jesús najc: Simón, ni gulälajzani Pedr.

<sup>17</sup> Dxejcti Jacob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii.

<sup>18</sup> Näj Andrés, Felipe, Bartolomé, Mateo, Tomás, Jacob xi'n Alfeo, Tadeo, Simón, ni di guidxejb rnigajc,

19 nāj Judas Iscariot, ni bato' Jesús loj reni rdx-  
echlajz lojni. Sä'tireni rolijz te dade'.

*Yäl̄rniyaj loj Sprit Dxañ xte Dios*  
(Mt. 12:22-32; Lc. 11:14-23; 12:10)

20 Dxejc bidopsac reben̄xhidaalga; nicla niajc ni-  
aunāj Jesús rexpejn̄pacni.

21 Che biejn diajg resa' Jesús dee, biädxhiirenini,  
sa'csi naareni, yejcni cayajc.

22 Rebejn̄ ni ruluii leii ni birii guedx Jerusalén  
bidzujn̄za lo Jesús, dxejc räjpreni:

—Beelzebú, nani rnibee reben̄dxab, yu' nen  
lastoo niguiire. Niluxh nani rnibee reben̄dxab  
rudeed yäl̄rnibee lo Jesús te cuääni ben̄dxab.

23 Dxejc gurejdx Jesús rebejn̄ga, bijyni te cuent  
ni ruluii lojreni, räjpni:

—¿Xho gurilaagw ben̄dxab lagajc saben̄dxabni?

24 Palga rebejn̄ xten te yäl̄rnibee la'reni, luxh  
til̄nāj te cuaani ste cuaaga, di yäl̄rnibeega chu xchej.

25 Palga te famil̄ rdil̄nāj lagajc sa'ni, di familga  
chu xchej.

26 Palga ben̄dxab nani rnibee til̄nāj lagajc laani,  
di xcäl̄rnibeeni chu xchej, sa'csi ni'c gun luuxni.

27'Rut gacdi jiu' rolijz te niguidaan, cuanni xhix-  
htenni, palga dini gulibxgaani, si'ctis sajc cuanni  
xhixhtenni.

28'Rniliäpac lojtu guiraa dojl̄ nājza yäl̄rniyaj xten  
rebejn̄ sajc jia.

29 Nani guiniyaj Sprit Dxañ xten Dios, digacdi  
guibicaj rextoj̄lni, anuutisni xtoj̄lni par tejpas.

30 Räjpni si'c sa'csi caniireni yu' ben̄dxab nen  
lastooni.

*Xnan con rebetzhuin Jesús*  
(Mt. 12:46-50; Lc. 8:19-21)

<sup>31</sup> Dxejcru bidzujn xnan Jesús, näj rebetzhuinni. Direni niu', baxhaltisreni chu huitejdxni.

<sup>32</sup> Rebejn ni sobga' gabi Jesús räjpreni lojni:  
—Xnanlu näj rebejtzlu suga' ro lä', caguiilreni luj.

<sup>33</sup> Dxejcti räjp Jesús lojreni:

—¿Chu reni'c najc xnanä näj rebetzä?

<sup>34</sup> Bahuigajcni loj renani sobga' gabini, dxejc räjpni lojreni:

—Redee najc xnanä, rebetzä.

<sup>35</sup> Chutis ni rujn ni rlanj Dios, ni'c najc betzä, bisianä, näjza xnanä.

## 4

*Xcuent niguii ni sale'c binij*  
(Mt. 13:1-23; Lc. 8:4-15)

<sup>1</sup> Suga' Jesús ro' nis guslosac caguluiini xtidx Dios, luxh bidojp xhidajl bejn cadre suga'ni. Xhidalduxh najcreni, ni'cni biu' Jesús nen te canuu ni suga' ro' nisga. Dxejcti gurejni nenga, biääd guiraa bejn bia'ntireni ro' nis.

<sup>2</sup> Dxejc baluiniireni guiraloj, ganax cuent ni ruluii guniini. Che caguluiini, räjpni lojreni:

<sup>3</sup> —Gucuadajgtu dee. Guyu' te niguii. Biriini sale'cni binij.

<sup>4</sup> Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga.

<sup>5</sup> Stee lajt biajb binijga nen̄ guij cadro xheti xhidajl yuj. Binijga gulengajcni, sa'csi xheti xhidajl yuj ro'c.

<sup>6</sup> Dxejc, sa'csi lo jiaa yu' xlobaani, che birii gubijdx, bigol̄ni, gubijdzitini.

<sup>7</sup> Stee lajt biajb binijga nen̄ yaguejch. Dxejcti biroob reyaguejchga, luxh bejnreni balaa loj binijga, ni'cni gujcni ganax bil̄ii.

<sup>8</sup> Per stee lajtga biajb binij lo yusa'c. Gulejn reyäjlgā, guroobreni, gucsa'creni. Yu'reni cuaj gal̄bitzūu xob, yu'reni cuaj gayoj̄n xob, yu'zarenī cuaj tegayūu xob.

<sup>9</sup> Dxejc rāj̄pni lojreni:

—Chutis ni r̄lajz guisieed, sucuadiajgni.

<sup>10</sup> Che asii xhidajl bejn̄, rebejn̄ nani suga' gajxh cadro suganāj̄ Jesús guitzubiti'o'p xpejn̄pacni gunabdiidx lo Jesús xhi sāloj cuentre.

<sup>11</sup> Dxejc rāj̄p Jesús:

—Dios abejn̄ gacbeetu te gantu xho najc yäl̄xhiga'tz xten xcäl̄rnibee Dios nani najc xhiga'tz najli. Niluxh lo ste'ca bejn̄ con cuenttis rniä guiraa recosre,

<sup>12</sup> te mase cahuiireni direni gumbee, te mase cayiejn̄ diajgreni, direni gacbee. Scree gacni, te na'c gusiejch lajzreni, te na'c guibicaj xtoj̄lreni.

<sup>13</sup> Rāj̄pzani lojreni:

—¿La ditu gacbee cuentre? ¿Xhocha gacbeetu xhidajlru cuent?

<sup>14</sup> Niguiire nani sale'c binij najc si'c te nani ruluii xtidx Dios.

15 Yu' bejn ni najc si'c binij ni biajb cuä' nezyuj: riejn diajgreni xtidx Dios nani ruluu bejn. Dxejc che jiejn diajgreni xtidx Dios, riääd Satanás rbägajcni xtidx Dios ni yu' neñ lastooreni.

16 Yu'za rebejn ni najc si'c binij ni biajb nen reguij, renani che jiejn diajgreni xtidx Dios, rbaa lajzreni rca'reni diidxga.

17 Niluxh direni nisiudzu'tz, sa'csi guxii huilii lajzreni. Che rdejdreri trabajw o che rusacsi bejnreni xcuent xtidx Dios, rusaanreni xtidx Dios.

18 Yu'zaren i najc si'c binij ni biajb neñ yaguejch, riejn diajgreni xtidx Dios,

19 dxejc che ru'ruren i yärsia' xcuent recos guedxliujre, rsia' lajzreni ga'preni meel, rlajzreni ga'pruren i guiraloj recos, dxejc riu' redee neñ lastooreni, rusäuumi lo xtidx Dios, xlia'si bejn diajgreni xtidx Dios.

20 Yu'za bejn ni riejn diajgreni xtidx Dios, rlii lajzreni diidxga, xhet xlia'ti bejn diajgreni xtidx Dios. Najcnen i si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

*Xhet yuchetzu'tzdi ni di guidzujn dxej sisäbdiidx  
(Lc. 8:16-18)*

21 Räjpa Jesús lojreni:

—¿La riädnätu te bajl te suuni dejtz te alm, o nen te loon, ä? ¿La xhet nanabdi suuni jiaa te guzanijni, ä?

22 Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni.

23 Pal yu' chu rlawz guisieed, sucuadiajgni.

24 Räjpa Jesús lojreni:

—Coļyunxgaa xhigab rediidx ni riejn diajgtu. Nani rusältu loj xhigabtu, ni'cza guniidx Dios xca'tu, luxh sisiojbru yejc ni xca'tu.

25 Renani rajp che'n yäl\_najn, lojreni sudeedru Dios yäl\_najn. Luxh renani xhetru rusäldi loj xhigabreni, sudzucaj Dios yäl\_najn nani rajpreni.

### *Xcuent binij ni roob*

26 Guniiza Jesús lojreni:

—Yäl\_rnibee xten Dios najc si'c rsiajc te niguii che rbe'cni binij lo yuj,

27 dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni.

28 Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejdzenej dojga.

29 Dxejcti che aguyajl bedze'ga, ruxhalni chu rituuigni, sa'csi abidzujn dxej ni guidojpnı.

### *Xcuent bedz muxhtas*

*(Mt. 13:31-32; Lc. 13:18-19)*

30 Räjpa Jesús:

—¿Xhini'c najc si'c najc xcäl\_rnibee Dios? ¿Xhi te cuent guiniinu te guiluiinuni?

31 Si'c te bedz muxhtas ni rbej loyuj, si'c najcni. Bedz muxhtas najcni bedz bäze'ru loj guiralii bedze' ni yu' loj guedxliuj.

<sup>32</sup> Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpalaani.

*Si'c baluii Jesús ganax con cuent*  
(Mt. 13:34-35)

<sup>33</sup> Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racheereni.

<sup>34</sup> Con recuent ni ruluiitis gunii Jesús lojreni. Niluxh lo rexpejn pacni basule'ni guiraa recuentre.

*Rusiadxi Jesús bej näj nisdo*  
(Mt. 8:23-27; Lc. 8:22-25)

<sup>35</sup> Lagajc gudxejga räjpni loj rexpejn pacni:  
—Coļcho', chonnu stelaad nis xten Galilee.

<sup>36</sup> Basa'ntireni rebejn, sanätireni Jesús neñ canuu cadre sobgajcni. Dxejcti sgaii canuu sanajlni.

<sup>37</sup> Chela gubi' te beduxh, gusloj cayu' nis neñ canuuga. Cadxaj canuuga nis.

<sup>38</sup> Nagayejs Jesús dejtz canuuga, nagayejsni. Bacuäänreni Jesús, räpgajceni lojni:

—Dad mastr, ¿la dilu jiu siääznu neñ nis, ä?

<sup>39</sup> Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgajc bej, biacdxini.

<sup>40</sup> Räjp Jesús loj rexpejn pacni:

—¿Xhicuent cadxebduxhtu? ¿La ditu chalilajz xtidxä, ä?

<sup>41</sup> Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?



## 5

*Nigui Gadara ni yu' beṅdxab neṅ lastooni*  
(Mt. 8:28-34; Lc. 8:26-39)

<sup>1</sup> Bidzujntireni stelaad ro' nisga, lo yuj xten Gadara.

<sup>2</sup> Si'ctis ni birii Jesús neṅ canuu, biädgajc te niguii lojni ni birii neṅ rebiliää cadro rga'tz beṅgut. Yu' beṅdxab neṅ lastoo niguiiga.

<sup>3</sup> Rbäjzni neṅ rebiliääga luxh rut rajcdi rucuaduuni, nicla con cadenguuib.

<sup>4</sup> Xhidajl huält agacbacuaduureni ni', naa niguiiga con cadenguuib, luxh litis batiuugni recadenguuibga, rut rajcdi rusiacdxini.

<sup>5</sup> Si'ctis canzajni, dxej, yääl. Rbedxa'ni neṅ redajn, neṅ rebiliää, luxh cagutiugni tiejxhni con reguij.

<sup>6</sup> Che bahuiini loj Jesús zijtru, baxuṅni huichaglojni Jesús, bazuxhijbni lojni.

<sup>7</sup> Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsílu narä.

<sup>8</sup> Sa'csi agac cayäjb Jesús lojni:

—Luj, beṅdxab, birii neṅ lastoo niguiiga.

<sup>9</sup> Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidalro, sa'csi xhidajl najcnu.

<sup>10</sup> Sanuutis canabni lo Jesús na'c guxhaṅni rebeṅdxabga ste'ca guejdx.

<sup>11</sup> Ro'c tre' xhidalduxh cuch cuä' dane'ga, caya-jwreni.

<sup>12</sup> Dxejc gunab rebe<sub>n</sub>dxabga loj Jesús, räjpreni:  
—Baxha<sub>l</sub> nuure loj recuchre te jiu'nu ne<sub>n</sub> lastooreni.

<sup>13</sup> Dxejcti basaan Jesúsreni. Biriiti rebe<sub>n</sub>dxabga ne<sub>n</sub> niguiiga, dxejc biu'reni ne<sub>n</sub> lastoo recuchga. Yu' si'cti tiop mi<sub>l</sub> cuch ro'c. Baxu<sub>n</sub> recuchga, dxejc biro<sub>l</sub>reni ro' guilaj, bitejbreni ne<sub>n</sub> nis, gujttireni ne<sub>n</sub> nisga.

<sup>14</sup> Renani cayajp recuchga baxu<sub>n</sub>reni, huiyeiireni diidxga ne<sub>n</sub> guejdx, näjza loniaa. Dxejc biääd bej<sub>n</sub> biädhuui nani gujc ro'c.

<sup>15</sup> Che bidzuj<sub>n</sub>reni cadre suga' Jesús, bahuiireni loj niguii nani guyu' rebe<sub>n</sub>dxabga ne<sub>n</sub> lastooni. Sobga'ni ro'c, najcwni xhajbni luxh nasa'c yejcn. Niguiire najc nani guyu' be<sub>n</sub>dxab ni laa Legión ne<sub>n</sub> lastooni. Bidxejbti rebej<sub>n</sub> nani bahuii lojni.

<sup>16</sup> Dxejcru rebej<sub>n</sub> ni bahuii xhi gujc ro', huiyeiireni diidx xho guzajc niguiire nani guyu' be<sub>n</sub>dxab ne<sub>n</sub>ni galoo, näjza nani guzajc recuch.

<sup>17</sup> Dxejc gusloj canabreni loj Jesús jiunejzni.

<sup>18</sup> Che biu' Jesús ne<sub>n</sub> canuu, niguii nani guyu' be<sub>n</sub>dxab ne<sub>n</sub> lastooni gunabni loj Jesús, räjpni:

—Huinä narä.

<sup>19</sup> Per di Jesús nusaan nijni. Räjp Jesús lojni:

—Huij rolijzlu, lo resa'lu. Huiyeii diidx lojreni xho bennäj Dadlu, näjza xho balaslajzni luj.

<sup>20</sup> Sä'ti niguiiga, gusloj cayujyni diidx ne<sub>n</sub> reguejdx xten Decápolis xho bennäj Jesúsni. Guiraa rebej<sub>n</sub> bidxeloj.

*Xindxa'p Jairo näjza gunaa ni bahual xhajb Jesús  
(Mt. 9:18-26; Lc. 8:40-56)*

21 Che bidzunsac Jesús stelaad ro' niska nen canuu, bidzujñ xhidalduxh bejn cadre suga'ni. Bia'nti Jesús ro' niska.

22 Dxejcru biääd te niguii nani laa Jairo, ni rnibee nen xquidobáz rexpen Israel. Che bahuiini loj Jesús, bazuxhijbni lojni.

23 Canabpacni lojni, räjpni:

—Xindxapä'ä acayejt. Gudaa, guzujlu ñaalu yejcní, te jiajcní, te guibajñni.

24 Sanäti Jesús bejnga. Xhidajl bejn sanajlni, luxh cagutäärenini.

25 Loj rebenxhidaalga yu' te gunaa ni agujc tziubi-tio'p ijz racxhuuni yälguidxbäii.

26 Agudedduxhni trabajw, abahuii xhidajl doctoorni. Xlia'si abanijtni guiraa nani rajpni, luxh xhet racnäjdini, alga rxuuruni.

27 Sa'csi biejn diajgni xhini'c canii rebejn xcuent Jesús, gubig gunaaga nez dejtz Jesús, guideb nen rebejn, bahualni xhajn Jesús.

28 Cayujñni xhigab, naani: “Palga narä falä xhajtisni, siacä.”

29 Lagajc dxejc guläjz caxe' xtiejñni, gucbeeza tiejxhni abirii xcälracxhuuni.

30 Gucbegajc Jesús yu' chu abasiajcní. Gubiregajcní nen rebenxhidaalga, räjpni:

—¿Chuni'c bahual xhabä?

31 Dxejcru räjp rexpejñpacni lojni:

—Rhuiilu benxhidaal cagutäälu, luxh ñaalu: “¿Chuni'c bahual xhabä?”

32 Sas cahuii Jesús nez ree, nez rec, te fini loj nani bahualni.

33 Dxejc bidxejb gunaare, racejsni, sa'csi gucbeeni xhini'c gujcní. Dxejc biäädni,

bazuxhijbni loj Jesús, räbliini loj Jesús guira'ti ni bejn̄ni.

<sup>34</sup> Dxejc räjp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolijzlu, abiajc xcälracxhuulu.

<sup>35</sup> Canisijc Jesús si'c che bidzuj̄n renani birii rolijz dade' ni rnibee neñ xquidobāz rexpej̄n Israel. Rājpreni:

—Agujt xindxape'lu. ¿Xhicuent rusieedrulu Dad mastr?

<sup>36</sup> Dxejc che biejn diajg Jesús nani caniireni, rāj̄pni lo dade'ga:

—Na'c guidxej̄blu. Bililajztis.

<sup>37</sup> Luxh dini nusaanru nij chu ninäni, Pedrtis näj Jacob näjza Juan bejt̄zni.

<sup>38</sup> Che bidzuj̄n̄ni rolijz dade'ga, bahuii Jesús bieȳj ni cayuj̄n rebej̄n ni rbedxa' roon.

<sup>39</sup> Biu'tini rāj̄pni:

—¿Xhicuent rujntu si'c? Gajd dxape're guet. Nagayejssini.

<sup>40</sup> Alga baxhiznājrenini. Dxejc gunibee Jesús birii guiraa rebej̄nga. Dxejcti huināni xcuzaj̄n dxape'ga con renani sanāni. Biu'reni cadro naga' dxape're.

<sup>41</sup> Gunaazni ñaa dxape'ga, dxejc rāj̄pni:

—Talita cumi —nani sāloj con xtiidxnu: Dxape', lojlu rniä, huistie.

<sup>42</sup> Dxejcti huistiegajc dxape'. Tzubitio'p ijz yu' dxape'ga. Bidxeloduxh rebej̄n ni bahuii guläs Jesús dxape'ga.

<sup>43</sup> Dxejc balijdx Jesús reni te rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

## 6

*Che guyu' Jesús Nazare't*  
(Mt. 13:53-58; Lc. 4:16-30)

<sup>1</sup> Dxej cru birii Jesús ro'c, huijni lajdxni, sanāzani rexpejn pacni.

<sup>2</sup> Che bidzujn sabd, dxej nani rusilajz rexpejn Israel, gusloj caguluiini neñ xquidobāz rexpejn Israel. Bidxeloj xhidajl bejn nani biejn diajg rextiidxni, rājpreni:

—¿Caro bisieed niguiire guiraa recosre? ¿Xhi yālnajnre cua'ni ni'c rajc rujni rextzunduxh Dios con naani?

<sup>3</sup> ¿La xhet laadi carpinteer, xi'n Marii, bejtz Jacob, nāj José, nāj Judas, nājza Simón dee, ā? ¿La xhet reedi rbājz rebisianhuinni?

Luxh bidxechlajzreni lojni.

<sup>4</sup> Dxej c rāj Jesús lojreni:

—Catis rināljazreni te ni rnii xtidx Dios. Lajdxnisni, lagajc loj resa'ni, rolijztisni, ro'c rut rināljazdini.

<sup>5</sup> Luxh di niajcdi niujn Jesús xhidajl milaagwr ro'c. Tiopchoñtis beñracxhuu basiajčni, bazujni naani yejcreni.

<sup>6</sup> Bidxelo Jesús sa'csi di lajzreni nilii. Caguluiitini neñ guiraa reguejdxe' ni ria'n gajxh nejzga.

*Baxhal Jesús tzubitio'p bejn ni rinajlni chaluireni xtidx Dios*  
(Mt. 10:5-15; Lc. 9:1-6)

<sup>7</sup> Dxej cru gurejdxni guitzubitio'p xpejn pacni. Gusloj caguxhalni tiopgajreni; badeedzani yālnibee lojreni te guinibeereni loj rebeñdxab.

<sup>8</sup> Gunibeeni xhet chanädireni lo nejz, ganaxhtis te yajg te sanäjreni. Di nungäjł chanäreni nicla bisiuud, nicla yätxtiil, niclaza meel neñ dobdäjł.

<sup>9</sup> Nungäjłza xcaj gura'ch ni'reni, năgajc ga'preni tejtis gamangw, xhet tio'pdini.

<sup>10</sup> Dxejcti răjpnı lojreni:

—Cadrotis jiu'tu neñ te guejdx, coljia'n neñ tejtis yu' guiraa redxej ni chutu guejdxga.

<sup>11</sup> Palga yu' te guejdx cadro direni gusaan jiu'tu luxh di rłajzreni cuadiajgreni diidx ni sanätu, colrıi guejdxga, colcuijb guxhuj ni'tu si'c te seen te gacheereni xhet laadi bejnreni. Rniliăpac lojtu, guxiiru trabajw ted rebeñ Sodoma năj rebeñ Gomorra quela rebejn ni yu' guejdx cadro direni gusaan jiu'tu.

<sup>12</sup> Dxejc biriireni, sääreni. Cayăbgajczeni nanabpac gusiejch lajz rebejn.

<sup>13</sup> Gulăăzarenı xhidajł beñdxab dxejcti gudăăbrenı se't yejc xhidajł beñracxhuu, luxh biajzrenı.

*Xcăłgujt Juan ni rutiobnis*

*(Mt. 14:1-12; Lc. 9:7-9)*

<sup>14</sup> Herodes najc nani rnıbee dxejc. Biejn diajgni xpala'n Jesús, sa'csi guiralii rebejn cală'p xpala'nni. Dxejc răjp Herodes:

—Juan nani rutiobnis ahuăjs loj rebengut, ni'c rajc rujnni remilagwre.

<sup>15</sup> Sgaii bejn răjp:

—Laa Elías ni gunii xtıdx Diosni.

Sgaiireni răjp:

—Laa te bejn ni rnii xtıdx Dios, o sa' te rebejn ni gunii xtıdx Dios agujc xchero.

16 Che biejn diajg Herodes si'c, räjpni:

—Laa Juan dee, nani gunibeä biru' yejcnı, luxh naj agubansacni loj rebengut.

17 Sa'csi lagajc Herodes gunibee biga' Juan, dx-  
ejc bacuaduurenini con cadenguiib nen latzguiib,  
xcäl\_nasa'c Herodías. Herodías gujc chääl Lib, bejtz  
Herodes, dxejc cua' Herodes gunaaga si'c chääl\_ni.

18 Räjp Juan loj Herodes:

—Xhet laadi rbäznäjlu chääl bejtzlu.

19 Ni'cni rdxechlajz Herodías loj Juan, luxh rla-  
jzni ju'tnini, luxh di niajcdini

20 sa'csi rdxejb Herodes Juan, sa'csi najnni  
bensa'c, ben\_d\_xan najc Juan, ni'cni dini nusaan ni-  
ujn Herodías latsiajni. Mase dini gachesa'c ni rnii  
Juan, rucuardiagsa'cni xtiidxni.

21 Niluxh guyu' xmood Herodías. Che gojl\_laj  
Herodes, bayaanni rexpejnni ni rnibee, näjza re-  
bejn nani sajz nez región Galilee.

22 Dxejcti biu' xindxa'p Herodías cadre  
cayajwreni, baya'ni nez lojreni. Bidxaglazduxh  
Herodes näjza rexpioozni baya' gunaaga, xindxa'p  
Herodías. Dxejc räjp Herodes lo gunaaga:

—Gunab ni rla\_jztislu loä, narä sunidxäni.

23 Dxejcru räplii Herodes lojni:

—Sunidxä xhitis ni guiniablu. Mase gala' yuj ni  
rnibeä.

24 Biriitini nen\_yu', huiye'tzni loj xnanni, räjpni:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

25 Huigajcni loj reii, sas gunabni lojni, räjpni:

—Rlazä gunid\_xgajclu loä yejc Juan ni rutiobnis.  
Nen te pla't baniidx yejcnı.

26 Dxejcti guc-huinduxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmexni, ni'c dipac rlajzni nudxojnni nani gunab gunaaga lojni.

27 Baxhalgajc reii te soldaad ni rcanäj ro'c, baxhalnini, te chaxiini yejc Juan.

28 Ni'c huij, dxejcti bagu'tni Juan neñ latzguiib, biädñätini yejc Juan neñ te pla't. Badeedtinini loj gunaaga. Dxejcti gunaaga badeednini loj xnanni.

29 Che biejn diajg rexpejn<sub>pac</sub> Juan si'c, biädläsreni togoolga. Dxejcti bacua'tzrenini neñ te baa.

*Bayaan Jesús gaii mil bejn*

*(Mt. 14:13-21; Lc. 9:10-17; Jn. 6:1-14)*

30 Che gubi' renani baxhal Jesús, bijreni diidx guiraa ni bejnreni näjza ni baluiireni.

31 Dxejc räjp Jesús lojreni:

—Cołtaa, xtebnu choñnu cadro rut rbäjzdi, guisi-laaznu tudxe'n.

Räjp Jesús si'c sa'csi yu' xhidajl bejn ni sää, ni siääd, nicla gal gauureni.

32 Dxejcti sääreni neñ te canuu cadro rut rbäjzdi.

33 Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujñreni loj Jesús näjza rexpejn<sub>pac</sub>ni, dxejcti bidojpreni lojni.

34 Birii Jesús neñ canuu, bahuiini loj beñxhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiinireni guiraloj.

35 Che gojl gudxej, gubig rexpejn<sub>pac</sub>ni lojni, räjpreni:



—Rut rbäjzdi ree, luxh agudxej naj.

<sup>36</sup> Baxhal rebejn te chääreni lo reguejdx, näjza rerench, te chasiireni yätxtiil gauureni sa'csi xheti xhi gauureni ree.

<sup>37</sup> Dxejc räjp Jesús lojreni:

—La'tu coldeed xhi gauureni.

Dxejc räjpreni loj Jesús:

—¿Xhixh sajl tiop gayuu meel yätxtiil chosiinu gauu guiraa rebenxhidajlre?

<sup>38</sup> Dxejcti räjp Jesús lojreni:

—¿Bal yätxtiil rajptu? Colchahuii.

Che gojnreni balni dxejc räjpreni:

—Gaii yätxtiil, näjza tiop bäj.

<sup>39</sup> Dxejcru gunibee Jesús räjpreni loj guiraa rebejn:

—Colcuej xcua-xcuaatu loj guixhaya'.

<sup>40</sup> Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni.

<sup>41</sup> Dxejcti cua' Jesús guigaii yätxtiilga näjza guiro'p bäjga, bahuiini xhaguibaa, badeedni xquixhtios loj Dios. Dxejcti gula'ni yätxtiil näjza guiro'p bäj, badeednini loj rexpejn pacni te badeedrenini loj guiraa rebenxhidaalga.

<sup>42</sup> Dxejc gudajw guiraareni, gudxaj xque'reni.

<sup>43</sup> Dxejcru batojpreni tzubitiop dxijm guidx-adoo yätxtiil näjza bäj ni bia'n.

<sup>44</sup> Luxh loj guiraa rebejn ni gudajw yu' si'cti gaii mil niguii.

*Guzaj Jesús loj nis  
(Mt. 14:22-27; Jn. 6:16-21)*

<sup>45</sup> Gunibee Jesús jiu' rexpejn<sub>u</sub>pacni neñ canuu, chägajcreni Betsaida, ni tre' dejt nis stelaad, lañi cagusadiidxni rebejn.

<sup>46</sup> Che gulujx basadiidxnireni, sääni neñ redane', sanabni lo Dios.

<sup>47</sup> Cheni acayu' guxhijn, yu' rexpejn<sub>u</sub>pacni neñ canuu galäii nis lañ ni suga' Jesús xtebni ro' nis.

<sup>48</sup> Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzeni stehuält. Dxejcru che acara yääl, gusaj Jesús loj nis, huijni cadro sasajreni, rlajzni ninijdni lojreni.

<sup>49</sup> Dxej che bahuiireni sasaj Jesús loj nis, naareni pet te beñmalni, ni'c guredxa'reni.

<sup>50</sup> Guiraareni bahuiireni lojni, bidxebduxhrene. Sas gunigajcni lojreni, räjpni:

—Col<sub>u</sub>sutijp lajztu. Laa naräni. Na'c guidxejbtu.

<sup>51</sup> Dxejcti huä'p Jesús neñ canuu cadro yu'reni. Lagajc dxejc biacdx bej, luxh laareni bidxelo-duxhrene,

<sup>52</sup> sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

*Basiajc Jesús rebeñracxhuu neñ guedx Genesare't  
(Mt. 14:34-36)*

<sup>53</sup> Gudejdreni lo nis, bidzujñreni lo yuj xten Genesare't. Ro'c bacuaduureni canuu ro' nis.

<sup>54</sup> Che biriireni neñ canuu, biembegajc rebejn Jesús,

<sup>55</sup> dxejcti birii rebejn guideb nejzga. Guslojti siädnärene beñracxhuu loj Jesús, naga' rebeñracxhuuga lo da'. Cadrotis rieñ diajgreni yu' Jesús riädnärene rebeñracxhuu.

<sup>56</sup> Niluxh cadrotis rij Jesús, nen reguedxbáz, nen reguedxro, nájza loj re<sub>re</sub>ench, rguixh<sub>re</sub>ni reben<sub>rac</sub>xhuu cadro rajc guii. Dxejcti rniabreni loj Jesús te gac caanreni xhajn<sub>ni</sub>, niluxh biajc guiralii renani gudajn xhajn Jesús.

## 7

### *Nani runij<sub>t</sub> lastoo bejn* (Mt. 15:1-20)

<sup>1</sup> Dxejcti refarisee, renani najc ben<sub>g</sub>uidoo loj guedx Israel, nájza g<sub>aii</sub> rebejn ni ruluii leii, renani birii Jerusalén, bidojpreni loj Jesús.

<sup>2</sup> Bahuiireni cayajw g<sub>aii</sub> rexpejn<sub>pac</sub> Jesús, luxh canii rebejn nacdxuudx naareni (dee säloj direni quiib <sub>na</sub>areni si'ctis ni rdiib <sub>naa</sub> reben lajdxreni). Ni'cni guniyajreni rexpejn<sub>pac</sub> Jesús.

<sup>3</sup> (Guiraa rebejn xten Israel, nájza refarisee, sasanäj nani baluii reben<sub>g</sub>ool ni yu' guedx Israelreni. Direni gauu palga direni quiib <sub>na</sub>areni balti huält.

<sup>4</sup> Che rbi'reni rijreni lo guii, rguibsa'creni <sub>na</sub>areni, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäj<sub>r</sub>ureni, luxh yu' mood rguibreni rextrastreni nájza rexplooreni, nájza rextrastguiibreni, nájza rexloonreni.)

<sup>5</sup> Dxejc gunabdiidx refarisee nájza rebejn ni ruluii leii loj Jesús, räjpreni:

—¿Xhicuent di rexpejn<sub>pac</sub>lu gun si'cni baluii reben<sub>g</sub>ool, niluxh rajwreni guideb nacdxuudx <sub>na</sub>areni?

<sup>6</sup> Dxejcti gunii Jesús lojreni räjpni:

—¡Ben guijdx! Laaca gunii Isaías xcuenttu che guniini xtidx Dios. Scree cajni loj guijtz: Guejdxre sanälajz narä con rextiidxni, niluxh lastooreni zistro suga' loä.

<sup>7</sup> Xlia'si ruzuxhijbreni, sa'csi direni chanälajz narä. Ruluiireni si'c xtiidxpac Dios nani rnii rebejn.

<sup>8</sup> Rusa'ntu xleii Dios, sasanädu'tztu costumbr nani baluii rebeᅅgool. Rdibsa'c rexploortu, rextrasttu, luxh rujnzatu xhidajlru cos sa' redee.

<sup>9</sup> Räjpza Jesús lojreni:

—Rusa'ntu xtidx Dios te risanäjtu recostumbr xtentu.

<sup>10</sup> Sa'csi räjp Moisés: “Huinälajz xtadlu con xnanlu.” Räjzani: “Suju'tpactu nani gudzubde yejc xtadni o yejc xnanni.”

<sup>11</sup> Niluxh la'tu rniitu sajc gäb bejn loj xtadni o loj xnanni: “Dina gapä xhi cojn gacnäälü” (nani säloj, abadedä guira'ti loj Dios).

<sup>12</sup> La'tu ditu gusaan gunru bejn por xtadni nicla por xnanni.

<sup>13</sup> Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

<sup>14</sup> Gurejdx Jesús guiraa rebejn, dxejc räjpni loj guiraareni:

—Colcuadiajg, colyabee xtidxä.

<sup>15</sup> Rexhicos yälrajw ni rajw bejn, dini gunijt bejnga, rediidx ni rii neᅅ lastoo bejn, näjza recos ni rujn bejn, ni'c runijt bejnga.

<sup>16</sup> Pal yu' chu rlajz guisieed, sucuadiajgni.

<sup>17</sup> Dxejcti gula'reni loj rebeᅅxhidaal, biu'reni nen yu'. Dxejc gunabdiidx rexpejᅅpacni loj Jesús xhi säloj cuent ni guniini.

18 Basejc Jesús diidx lojreni, räjpni:

—¿La näjza la'tu xheti xcäriejntu? ¿La di'tu gacbee xhitis yälrajw nani riu' neñ beñ digacdi gunijni lastoo beñ, ä?

19 Sa'csi dini jiu' neñ lastooni; riu'ni xque'ni, rdejdtini.

Si'c guniini te baluini guira'ti xhicos najc naya.

20 Dxejc räjpni:

—Rediidx ni rii neñ lastoo beñ, näjza recos ni rujn beñ, ni'c sii runijt lastoo beñ.

21 Sa'csi neñ lastoo rebeñ rii rexhigabguijdx, näjza yälresnäjä chääl sa'ni, yälresnäjä ni xhet najc di chääl ni, yälругu't sa'ni,

22 yälgubaan, yälrlajzni ga'pni xhixhten beñ, yällatsiaj, yälrusgueeni, yäl xheti xtuuj lojni, yälrdxechlajz, yälrudzubde sa'ni, yälhayechlajzni, yälguyalajz.

23 Guiraa reyällatsiajre neñ lastoo beñ riireni, luxh reni'csi runijt beñ.

*Tej guna Sirofenicia ni bililajz xtidx Jesús  
(Mt. 15:21-28)*

24 Dxejc biriini ro'c, sääni nez guedx Tiro näjza nez Sidón. Ro'c bia'nni neñ te yu' sa'csi di rlajzni niacbee rebeñ caro yu'ni, niluxh di niajcdi niuxhiga'tztisni.

25 Biengajc diajg te gunaa ro'c yu' Jesús. Xindxape' gunaaga yu' beñdxab neñ lastooni. Bidzujñ gunaaga, bazuxhibni lo Jesús.

26 Gunaaga rnii griegw, najcni beñ Sirofenicia. Gunabni lojni guinibeeni guirii beñdxabga neñ lastoo xi'nni.

27 Dxejc räjp Jesús lojni:

—Basaan gauxгаа rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

<sup>28</sup> Dxejç gunii gunaaga, räjpni loj Jesús:

—Yo, Dad. Näjza rebäcuc' ni suga' neñ mex rajw nani rtejb ro' rebiuux.

<sup>29</sup> Dxejcti räjp Jesús lojni:

—Laaca rniliilu. Huij rolijzlu. Abirii beñdxab neñ lastoo xindxape'lu.

<sup>30</sup> Luxh che bidzujñ gunaare rolijzni, a dxape' naga' lo da'. Gucbegajç gunaaga abirii beñdxab neñ lastoo dxape'ga.

### *Basiajç Jesús te beñgop*

<sup>31</sup> Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujñtini ro' nis xten Galilee.

<sup>32</sup> Biädnä gaii bejñ te niguii ni nacua't diajgni lo Jesús. Digacdiza guinisa'c niguiiga. Biäd nabreni lo Jesús nusujni ñaani yejç niguiiga.

<sup>33</sup> Dxejcti badzucajnini loj rebejñ. Baquitzgajçni rebicueñaani neñ diajgni, dxejcru batiobxhejni, gudajñtini lujdxni.

<sup>34</sup> Bahuiini xhaguibaa, bazaa lajzni, dxejç räjpni: —¡Efata! —nani säloj bixal.

<sup>35</sup> Dxejcru bixalgajç rediajgni, gubañgajç lujdxni, gunisa'cni.

<sup>36</sup> Dxejcti gunibee Jesús rutlojdi gäbreni, per che räjpni lojreni si'c, laareni batie'chrureni diidxga.

<sup>37</sup> Rdxeloduxhreni, räjpreni:

—Guira'ti laaca rujñni; ruxhalni diajç redi-agcua't, luxh rusniini regop.

## 8

*Bayaan Jesús tajp mil bejn*  
(Mt. 15:32-39)

<sup>1</sup> Neñ redxejga bidojp xhidalro bejn, luxh xheti xhigauureni. Dxejc gurejdx Jesús rexpejn<sub>pacni</sub> ni rinajlni, räjpni lojreni:

<sup>2</sup> —Rulazlazä rebejn<sub>re</sub>, sa'csi naj rajc choñ dxej tre'reni loä, luxh xhet yu'di gauureni.

<sup>3</sup> Niluxh palga guxhalä<sub>reni</sub> rolijzreni, xliajzreni, sidxajg<sub>reni</sub> lo nejz; sa'csi yu' renani zijtru siäädreni.

<sup>4</sup> Dxejcru räjp rexpejn<sub>pacni</sub> lojni:

—¿Caro chaca'nu yätxtiil te cha xque' rebejn<sub>re</sub> ree, cadro rut rbäjzdi?

<sup>5</sup> Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdz<sub>tisni</sub>.

<sup>6</sup> Gunibee Jesús gurej reben<sub>xhidaalga</sub> loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj rexpejn<sub>pacni</sub> te guteedrenini loj reben<sub>xhidaal</sub>. Bateed<sub>tireni</sub> yätxtiilga lo reben<sub>xhidaalga</sub>.

<sup>7</sup> Rajpzareni gaii bälbäz, dxejcti bade<sub>sac</sub> Jesús xquixhtios lo Dios, gunibeeni bateedzareni rebälbäz<sub>re</sub> loj reben<sub>xhidaalga</sub>.

<sup>8</sup> Dxejc gudajwreni, gudxaj xque'reni. Dxejc batojp rexpejn<sub>pac</sub> Jesús gajdz dxijm<sub>re</sub> reyätxtiil näj rebäj<sub>l</sub> dxuc ni bia'n.

<sup>9</sup> Niluxh renani gudajwga najcreni si'cti tajp mil bejn. Dxejcti basadiid<sub>xnireni</sub>.

10 Biunägajc Jesús rexpejn<sub>pacni</sub> neñ canuu, biädreni nez Dalmanuta.

*Gunab refarisee te senro loj Jesús*  
(Mt. 16:1-4; Lc. 12:54-56)

11 Biäd refarisee, renani najc reben<sub>guidoo</sub> loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni.

12 Dxejcti bazaa lajz Jesús neñ lastooni, räjpni:

—¿Xhicuent r<sub>lajz</sub> rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

13 Dxejcti basa'nnireni ro'c, biusacni neñ canuu, sä'tini stelaad nisga.

*Levaduur xten refarisee*  
(Mt. 16:5-12)

14 Biallajzreni nica'reni yätxtiil, luxh xhetliidi sanädireni. Tejtis yätxtiil nuureni neñ canuu.

15 Cagulijdx Jesús rexpejn<sub>pacni</sub>, räjpni lojreni:

—Col<sub>susiñ</sub>, col<sub>nati</sub> levaduur xten refarisee, col<sub>natiza</sub> levaduur xten Herodes. (Nalajznu, xtiidxreni najc si'c levaduur.)

16 Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

17 Che guchee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La laltis nacnajd lastootu?

18 ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj?



19 Che gula'a guigaii yätxtiil te gudajw gaii mil niguii, ¿bal dxijm yätxtiil biujy batojptu?

Sas räjpreni lojni:

—Tzubitio'pni.

20 —Che gula'a guigajdz yätxtiil te gudajw tajp mil bejn, ¿bal dxijm yätxtiil biujy batojptu?

Sas räjpreni:

—Gajdzni.

21 Dxejc räjpni lojreni:

—¿La gajdtu gachesa'c xhi benä?

*Basiajc Jesús te lotiä'p Betsaida*

22 Bidzunäj Jesús rexpejn pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga.

23 Dxejc gunaazni naa lotiä'pga, guläänini nen guejdx. Che batiobxhejn ni nen rebalojni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

24 Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojreni.

25 Basusac Jesús naani yejc rebaloj bejnga. Dxejc bejn Jesús bahuii bejnga. Biajctini, zijtru gujc bahuisa'cni lo guiraa rebejn.

26 Dxejcti baxhal Jesúsni rolijzni, räjpni:

—Basquejn, huijga rolijzlu, na'c jiu'lu nen guejdx, na'c gäblu xhi gujclu lo rebejn ni yu' nen guejdx.

*Basule' Pedr Jesús najc Crist*

*(Mt. 16:13-20; Lc. 9:18-21)*

27 Birinäj Jesús rexpejn pacni lo reguejdx ni ria'n nez Cesarea xten Filipo. Lałni sasajreni lo nejc räjp Jesús loj rexpejn pacni:

—¿Chuni'c rnii rebejn nacä narä?

<sup>28</sup> Sas räjpreni lojni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn ni gunii xtidx Dios.

<sup>29</sup> Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

<sup>30</sup> Dxejcti räjp Jesús lojreni:

—Rutlojdi gäbtu chu nacä.

*Gunii Jesús xho guetni*

*(Mt. 16:21-28; Lc. 9:22-27)*

<sup>31</sup> Dxejcti gusloj Jesús caguluiini rexpejñpacni, räjpni:

—Narä nacä Xi'n Dios, ni gujc Niguii. Nanab-pac tedä trabajwduxh. Sibälaz rebeñgool ni najc guxhtis neñ guedx Israel narä, näjza renani rnibee loj rebixhojz, näjza rebejn ni ruluii leii: sugu'treni narä, luxh ni riojn dxej guibañsacä lo rebeñgut.

<sup>32</sup> Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

<sup>33</sup> Dxejc batzuré loj Jesús, bahuiini loj rex-pejñpacni. Dxejc gudilñäjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejñtis rujñlu.

<sup>34</sup> Dxejc gurejdxni rebeñxhidaal con reni najc xpejñpacni, räjpni lojreni:

—Palga yu' chu rlajz gac xpenäpac, sucuääz gunni ni rsia' lajzni gunni, sutedni trabajw si'c tej ni caj lo cruzj, sujiädñajni narä.

<sup>35</sup> Sa'csi nani rla<sup>j</sup>z gu<sup>s</sup>laa xcä<sup>l</sup>na<sup>baj</sup>n<sup>n</sup>i, suni<sup>j</sup>t<sup>n</sup>i xcä<sup>l</sup>na<sup>baj</sup>n<sup>n</sup>i. Luxh nani runi<sup>j</sup>t xcä<sup>l</sup>na<sup>baj</sup>n<sup>n</sup>i xcä<sup>l</sup>na<sup>s</sup>a'c narä, xcä<sup>l</sup>na<sup>s</sup>a'c xti<sup>d</sup>xä, si<sup>l</sup>ia<sup>a</sup>pac xcä<sup>l</sup>na<sup>baj</sup>n<sup>n</sup>i.

<sup>36</sup> Xli<sup>a</sup>' ga'p be<sup>j</sup>n guiralo<sup>j</sup> lo gued<sup>x</sup>liu<sup>j</sup>re palga nit<sup>n</sup>i lo Dios par te<sup>j</sup>pas.

<sup>37</sup> Xhet gac<sup>d</sup>i gudeed be<sup>j</sup>n te guiba<sup>n</sup>nä<sup>j</sup>n<sup>i</sup> Dios.

<sup>38</sup> Nani guitu<sup>i</sup>nä<sup>j</sup> narä con rexti<sup>d</sup>xä naj, cheni najc rebe<sup>j</sup>n be<sup>n</sup>do<sup>j</sup>l, narä, Xi'n Dios nani gu<sup>j</sup>c Nigu<sup>i</sup>i, situinä<sup>a</sup>zani che jä<sup>d</sup>na<sup>a</sup> reangl xten Dios che jä<sup>l</sup>lä<sup>a</sup> lo xcä<sup>l</sup>rdim<sup>b</sup>icha' Xtadä.

## 9

<sup>1</sup> Dxe<sup>j</sup>c rä<sup>j</sup>p Jesús lo<sup>j</sup>reni:

—Rnili<sup>a</sup>pac lo<sup>j</sup>tu, yu'reni suga' ree nani di guet fixga<sup>a</sup>reni abiä<sup>a</sup>d xcä<sup>l</sup>rnibe<sup>e</sup> Dios.

### *Gubixhlo Jesús garenca*

*(Mt. 17:1-13; Lc. 9:28-36)*

<sup>2</sup> Che gude<sup>j</sup>d xho'p dxe<sup>j</sup>, Jesús cua' Pedr, nä<sup>j</sup> Ja<sup>c</sup>oob, nä<sup>j</sup>za Juan, laatis<sup>r</sup>eni huinä<sup>n</sup>i ye<sup>j</sup>c te danro. Ro'c gubixhlo<sup>j</sup>ni garenca lo<sup>j</sup>reni.

<sup>3</sup> Guslo<sup>j</sup> rdim<sup>b</sup>icha' re<sup>x</sup>h<sup>a</sup>j<sup>b</sup>ni, gu<sup>j</sup>c xh<sup>a</sup>j<sup>b</sup>ni nolbä<sup>j</sup>. Rut raj<sup>c</sup>ti rusqui<sup>j</sup>tz la<sup>j</sup>d lo gued<sup>x</sup>liu<sup>j</sup>re si'c bi<sup>q</sup>ui<sup>j</sup>tz xh<sup>a</sup>j<sup>b</sup>ni.

<sup>4</sup> Dxe<sup>j</sup>c balu<sup>i</sup>ilo<sup>j</sup> Elías nä<sup>j</sup>za Moisés lo<sup>j</sup>reni, cayu<sup>i</sup>nä<sup>j</sup>reni Jesús di<sup>i</sup>dx.

<sup>5</sup> Sas rä<sup>j</sup>p Pedr lo<sup>j</sup> Jesús:

—Dad, laaca dxun<sup>n</sup>u ree. Naj jiennu cho<sup>n</sup> yugu<sup>i</sup>xa', te<sup>j</sup>ni xten<sup>l</sup>u, steeni xten Moisés, steeni xten Elías.

<sup>6</sup> Si'c guni<sup>i</sup>ni sa'csi ni<sup>c</sup>la niacbeeni xh<sup>i</sup>ni'c guini<sup>i</sup>ni, sa'csi cad<sup>x</sup>eb<sup>d</sup>uxh<sup>r</sup>eni.

<sup>7</sup> Dxejc biääd te za bejn balaa yejcreni. Neñ zaga biejn xse' te ni räjp:

—Dee najc xi'nä nani sanälazä, colcuadiajg xti-idxni.

<sup>8</sup> Che batzuré lojreni, bahuiireni rutru suganäjti Jesús, xtebtis Jesús suga'.

<sup>9</sup> Che siädjiäjtreni dajnga, gunibee Jesús rut lojdi guiniireni xcuent ni bahuiireni, guiban\_xgaasi Xi'n Dios nani gujc Niguii lo rebeñgut.

<sup>10</sup> Basälcheereni rediidxre neñ lastooreni. Dxej-cru canabdiidx lo sa'reni xhicha säloj guiban\_sacni lo rebeñgut.

<sup>11</sup> Sas gunabdiidxreni lojni, räjpreni:

—¿Xhicuent rnii remastr xten leii naquiinpac jiäd\_xgaa Elías?

<sup>12</sup> Dxejcti bazejcnii diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijt\_z xcuent Xi'n Dios ni gujc Niguii, sidejdni trabajwduxh, rutza jiudini?

<sup>13</sup> Luxh narä rniä lojtu, abiääd Elías, luxh bennäjrenini si'ctis ni rlajzreni, si'cpac ni caj loj guijt\_z ni rusule' xcuentni.

*Basiajc Jesús te biuux ni guyu' bendxab nen las-tooni*

*(Mt. 17:14-21; Lc. 9:37-43)*

<sup>14</sup> Che asiäädreni cadro tre' sgaii rexpejñpac Jesús, bahuiireni loj xhidalro bejñ ni tre' lojreni, luxh cayeinäj rebejñ ni ruluii leiireni.

<sup>15</sup> Che bahuii guiraa rebejñ loj Jesús, bidxeloduxhreni, baxun\_reni, huiye'tzreni xchan lojni.

<sup>16</sup> Dxejc gunabdiidx Jesús lojreni:

—¿Xhini'c rusieinäjtu laareni?

17 Sas gunii tej reni yu' lo be<sub>n</sub>xhidaalga, räjpni:  
—Dad, ree siädnää xi'nä lojlu, yu' be<sub>n</sub>dxab ne<sub>n</sub>  
lastooni, nani rujn najcni gop.

18 Cheni rniaaznini, rutienta'ni xi'nä, luxh  
ri<sub>d</sub>uxh bitzu<sub>n</sub> ro'ni, näjza rauya'ni ro'ni, luxh  
cabijdzni. Aräpä loj rexpej<sub>n</sub>paclu cuääreni  
be<sub>n</sub>dxabga, niluxh di niajcdi nibäärenini.

19 Dxejcti gunii Jesús lojreni, räjpni:

—La'tu, bej<sub>n</sub> ni di chalilajz, ¿gucli chu'ä lojtu te  
chalilajztu? ¿Gucli gusieedtu narä? ¡Cołtanäni loä!

20 Dxejc biädnäreni biuuxga lojni. Che bahuii  
be<sub>n</sub>dxab lo Jesús, basnijni bi'nga, basälta'tinini lo  
yuj. Sädiidxni, luxh carii bitzu<sub>n</sub> ro'ni.

21 Gunabdiidx Jesús loj xtdani:

—¿Gucli rajcni si'c?

Dxejc räjp dade'ga:

—Che gujclini biuxbäz.

22 Balti huält rusäl<sub>n</sub>nini lo guiboo näjza lo nis te  
ju'tnini. Palga yu' xhi gac gunlu, balazlajz nuunu,  
gucnäj nuunu.

23 Sas räjp Jesús lojni:

—¿Xhicuent rniabdiidxlu la sajc gacnäälü?  
Xhitis sajc gac par nani rililajz.

24 Guredxa' xtda bi'nga, räjpni:

—¡Rililazä! Gucnäj narä te chaliiru lazä.

25 Che bahuii Jesús bixa't xhidajl bej<sub>n</sub> lojni, gu-  
didxa'ni lo be<sub>n</sub>dxabga räjpni lojni:

—Be<sub>n</sub>dxab ni rujn gop, narä canibeä, birii ne<sub>n</sub>  
lastoo bi'nga. Na'cru chulu ne<sub>n</sub> lastooni.

26 Dxejcru guredxa' be<sub>n</sub>dxabga, luxh basnibze-  
jsni bi'nga, dxejcru biriini ne<sub>n</sub> lastooni. Astoo te  
be<sub>n</sub>gut bia'n bi'nga ro'c. Xhidajl rebej<sub>n</sub> räjp:

—Agujtni.

27 Dxejc gunaaz Jesús naa bi'nga guläsnini. Guzuliiti bi'nga.

28 Dxejcti che abiu' Jesús neñ yu', gunabdiidx rexpejn̄pacni lojni:

—¿Xhicuent di niajcdi nibäänu beñdxabga?

29 Dxejc räjp Jesús lojreni:

—Di gacdi cuäätu sa' beñdxabre palga ditu cuedx-guinab lo Dios, palga ditu gucuan̄xgaa.

*Gunisac Jesús xho guetni*

*(Mt. 17:22-23; Lc. 9:43-45)*

30 Dxejc biriireni ro'c, gudejdreni Galilee. Luxh di rlanj Jesús niachee rebejn̄ sadejdreni nejzga,

31 sa'csi caguluiini rexpejn̄pacni. Cayäjpni lojreni: “Xi'n Dios ni gujc Niguii sidejdni ladz̄naa rebejn̄, niluxh sugu'trenini. Che guiza' choñ dxej gujtni, sibaj̄nni stehuält.”

32 Niluxh laareni direni niachee xhini'c guniini, bidxeljzareni niniabdiidxreni lojni.

*¿Chuni'c sajcru?*

*(Mt. 18:1-5; Lc. 9:46-48)*

33 Bidzuj̄ntireni Capernaum. Che biu'ni neñ yu' räjpni lojreni:

—¿Xhini'c cagusiejytu lo nejz?

34 Dxejc xhet guniitireni, sa'csi laareni cagusieinäj sa'reni lo nejz don chuni'c sajcru lojreni.

35 Sas gurej Jesús, dxejc gurejdxni guitzubitio'p xpejn̄pacni, räjpni lojreni:

—Palga yu' chu rlanj gasajcru lojtu, sugacxgaani si'c te nani xhet sajcti, sugunzani xtzuun chutis.

36 Dxejcti cua'ni tej biuxbäz, huinänini galäiireni. Dxejc gudääzni biuxbäzga, räjpni lojreni:

37 —Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjtni, näjza xtadä nani baxhaļ narä racnäjni.

*Nani di guiniyaj nuunu, xladnu yu'ni*

*(Lc. 9:49-50; Mt. 10:42)*

38 Dxejcti gunii Juan räjpni lojni:

—Bahuiinu lo te bejn ni rbää bendxab con xcälrnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

39 Dxejc räjp Jesús lojni:

—Na'c gudxoјntu gunni si'c sa'csi bejn nani rujn milagwr con xcälrnibee laä digacdi guiniyagajcni narä.

40 Nani di guidxagdijl nuunu, xlaadnu yu'ni.

41 Rniliäpac loјtu, chutis ni guniidx te bas nis loјtu sa'csi najctu xpeјnpac Crist, siguiјx Diosni xcuent nani bejnni.

*Nani rujn jiajb bejn lo doјl*

*(Mt. 18:6-9; Lc. 17:1-2)*

42 'Chutis ni gusiu' tej rebiuxe' ni rililajz narä neņ doјl, sugaļ te guimolin yeјnni dxejcti gucuaarenini lo nisdoo.

43 Palga tej ņaalu gun gunlu doјl, batiu'ni: hueenru natiuјnglu chaläjzlu cadro yu' Dios quela soјb guiro'p ņaalu gusälreni luj gabijl, lo bajl ni di jiuui,

44 cadro diza xpisiuјgreni guet, diza bajl jiuui.

45 Luxh palga tej ni'lu gun gunlu doјl, batiu'ni: hueenru nitiuјnglu chaläjzlu cadro yu' Dios quela soјb guiro'p ni'lu luxh chäälu gabijl, lo bajl ni di jiuui,

<sup>46</sup> cadro di xpisiujgreni guet, diza bajl jiuii.

<sup>47</sup> Luxh palga tej balojlu gun gunlu dojl, gulääni: hueenru chäälu cadro rnibee Dios natiä'p lojlu quela sojb guiro'p balojlu chäälu gabijl,

<sup>48</sup> cadro di xpisiujgreni guet, diza bajl jiuii.

<sup>49</sup> 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios.

<sup>50</sup> Hueen najc sejd, luxh palga agudejd yäl nadzij yejcn, ¿xho guntu te gacsacni nadzij? Colyajc nadzij la'tu, colguibaññäsa'c sa'tu.

## 10

*Baluu Jesús xcuent rälrur'o'n sa'ni*

*(Mt. 19:1-12; Lc. 16:18)*

<sup>1</sup> Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidojp xhidajl bejn lojni stehuält, sas guslosacni caguluiinireni si'ctis ni ruluiinireni.

<sup>2</sup> Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan chäälni, ä?

<sup>3</sup> Dxejc laani bazejcn diidx, räjpni lojreni:

—¿Xhini'c gunibee Moisés guntu?

<sup>4</sup> Dxejcru räjpreni:

—Moisés basaan gudeedni te guitiz gusaan chäälni che guro'nnini.

<sup>5</sup> Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu.



<sup>6</sup> Niluxh che birixtiej beṅ guedxliuj, “niguii con gunaa benchee Diosreni.”

<sup>7</sup> “Ni'cni te niguii siriini loj xtdani, loj xnanni te cuāznājni chāāl̄ni.

<sup>8</sup> Niluxh renani gujc tiop bejṅ sajcreni si'c tejsi bejṅ”, dirureni gac tiop bejṅ, si'c tejsi bejṅ gacreni.

<sup>9</sup> Na'c gudzucaj bejṅ lo sa bejṅni nani abachaag Dios lo sa'ni.

<sup>10</sup> Che biu'reni neṅ yu' gunabdidxsac rexpejṅpacni lojni xcuent rediidxre.

<sup>11</sup> Dxejc rājṅni lojreni:

—Chutis niguii ni gusaan chāāl̄ni, sas guchṅaani ste'cani, rujṅni dojṅ.

<sup>12</sup> Niluxh palga gunaa guro'n chāāl̄ni sas guchṅaani ste'ca niguii, rujnzani dojṅ.

*Gunab Jesús gunle' Dios yejc rebiuxbāz  
(Mt. 19:13-15; Lc. 18:15-17)*

<sup>13</sup> Biādñāza rebejṅ biuxbāz lojni te gutzuub Jesús ṅaani yejcreni, sas gudidxa' rexpejṅpacni lojreni.

<sup>14</sup> Che bahuii Jesús xhi cayujṅ rexpejṅpacni, bidxe'chni rājṅni lojreni:

—Colsaan jiāād rebiuxbāz loä. Na'c gudxojn-tureni, sa'csi xcāl̄nibee Dios najc xten reni najc nadolajz si'c najc biuxbāz.

<sup>15</sup> Rniliāpac lojtu, chutis ni rlaiz jiu' lo xcāl̄nibee Dios nanab guzobdiajgreni xtidx Dios si'c ruzobdiajg rebiuxe' xtidx xtdareni. Palga dini gun si'c, dini jiu' lo xcāl̄nibee Dios.

<sup>16</sup> Dxejcti gudāāz Jesús rebiuxbāz, bazujzani ṅaani yejcreni, gunab Jesús gunle' Dios yejcreni.

*Te bi'n ni rapduxh gunināj Jesús  
(Mt. 19:16-30; Lc. 18:18-30)*

17 Che birii Jesús loj xnejzni, ruxun te niguii biääd lojni, bazuxhijbni. Dxejcti gunabdiidx niguiiga lojni räjpni:

—Dad, beṅsa'c, ¿xhini'c gunä te xca'ä yälṅabajṅ par tejpas?

18 Sas räjp Jesús lojni:

—¿Xhicuent rniilu loä beṅsa'c? Tejtisni najc beṅsa'c; Diostis najc beṅsa'c.

19 Najnlu xhini'c gunibee Dios gunni: “Na'c guesnäjlü chääl sa'lu, na'c ju'tlu, na'c cuanlu, na'c gusgueelu chutis, na'c cuäälü yejc xhixten sa'lu, huinälajz xtadlu, xnanlu.”

20 Dxejc räjp niguiiga lojni:

—Dad, guiraa redee cayunä cheni gucäli bi'n.

21 Che bahuii Jesús lojni, huinälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejṅ nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

22 Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

23 Dxejc bahuii Jesús guideb gabi lojreni, räjpni loj rexpejṅpacni:

—Naganduxh jiu' rebejṅ nani yu'duxh xhixtenni lo xcälṅribee Dios.

24 Dxejc bidxelo rexpejṅpacni che biejn diajgreni rextiidxni. Dxejc räjp Jesús lojreni stehuält:

—¡Aitu xi'näl!, lacti naganduxh gusaan renani sanälajz xhixtenni guinibee Diosreni.

<sup>25</sup> Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

<sup>26</sup> Dxejc bidxeloduxhreni, räjpreni lojni:

—¿Chuxhni'c sajc laa lo dojl?

<sup>27</sup> Dxejc bahuii Jesús lojreni, räjpni:

—Bejn digacdi guslaa sabejn<sub>ni</sub>, Diostis rajc ruslaa bejn lo dojl, sa'csi Dios rac rujn guira'ti.

<sup>28</sup> Sas gusloj Pedr cayäjp lojni:

—Naj nuure ahuilälaznu guira'ti te siopnajl<sub>nu</sub> luj.

<sup>29</sup> Dxejc räjp Jesús:

—Rniliäpac lojtu, chutis nani cuälaz rolijzni, rebejtzni, rebisiajn<sub>ni</sub>, xtadni, xnanni, chäälni, rexi'nni, rexyujni, xcäl<sub>na</sub>sa'c narä, näjza xcäl<sub>na</sub>sa'c xtidx Dios,

<sup>30</sup> sica'ni lo guedxliujre te gayuu huält xhidajlru. Sica'ni rolijzni, rebejtzni, rebisiajn<sub>ni</sub>, xnanni, rexi'nni, rexyujni. Sisiunajlrenini naj, dxejc xhaguibaa sica'ni yäl<sub>na</sub>baj<sub>n</sub> par tejpas.

<sup>31</sup> Xhidajl rebejn nani sajc lo guedxliujre xhet sajcdireni xhaguibaa; niluxh rebejn nani xhet sajcdi lo guedxliujre, xhaguibaaru gasajceni.

*Gunisac Jesús diidx xho guetni*

*(Mt. 20:17-19; Lc. 18:31-34)*

<sup>32</sup> Dxejcru sasaj Jesús, nijdni lo rexpejn<sub>pac</sub>ni sääreni Jerusalén, luxh cadxelojreni. Cadxejbza rebejn nani sanajlreni. Dxejcti guläsac Jesús rexpejn<sub>pac</sub>ni lo rebejn, gusloj cayäjp<sub>ni</sub> lojreni guira'ti nani sacni.

<sup>33</sup> Räjp Jesús:

—Sionnu Jerusalén, luxh narä, Xi'n Dios nani gujc Niguii, sidedä ladz<sub>na</sub> rebixhojz nani rnibee

näjza rebejn ni rului lei. Luxh sinibeereni guetä. Suteedreni narä lo rebenzijt nani digac xpejn Is-rael.

<sup>34</sup> Suxhisnäjreni narä, siguijnreni narä, sutiobx-hejnzareni loä, dxejcru sugu'treni narä. Che riojn dxej sibaṣacä.

*Gunab Jacob näjza Juan te yälṇasa'c  
(Mt. 20:20-28)*

<sup>35</sup> Dxejcti gubig Jacob näjza Juan, rexi'n Zebe-deo, räjpreni lojni:

—Dad, rlaaznu gunlaalu nani guiniabnu lojlu.

<sup>36</sup> Dxejc räjp Jesús lojreni:

—¿Xhini'c rlajztu gunä xcuent la'tu?

<sup>37</sup> Räjpreni:

—Cue tejnu cuä'lu ladbee, xteenu cue cuä'lu ladbägw che acanibeelu.

<sup>38</sup> Dxejc räjp Jesús lojreni:

—Ditu gan xhini'c rniabtu. ¿Xhixh sajc yätu nani yä'ä? ¿Xhixh sajca guirobnistu si'cni guirobnisä? Nalajznu, xhixh sajc tedtu trabajw nani tedä narä.

<sup>39</sup> Sas räjpreni lojni:

—Sajc tednuni.

Dxejc räjp Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä.

<sup>40</sup> Te cue tejtu ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

<sup>41</sup> Luxh che biejn diajg stzuureni bidxe'chreni loj Jacob näjza loj Juan.

<sup>42</sup> Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxaglazj gasajcrueni lo rebejn. Luxh rebejn ni sajc rnibeduxhzeni lo rebejn.

<sup>43</sup> Xhet si'cdi guntu la'tu. Chutis nani rlazj gasajcru lojtu, riäjł gacni mos lojtu.

<sup>44</sup> Luxh chutis la'tu nani rlazj gasajcru, riäjł gacni xmos guiraatu.

<sup>45</sup> Di Xi'n Dios ni gujc Niguui niääd, te ga'ptisni mos, biäädzani te quiixni con xcälñabajñni te laa xhidajł bejn lo dojł.

*Basijc Jesús Bartimeo, ni natiä'p lojni*

*(Mt. 20:29-34; Lc. 18:35-43)*

<sup>46</sup> Dxejcti biäädreni Jericó. Che birii Jesús ro' guedx Jericó con rexpejñpacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn.

<sup>47</sup> Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlazj narä.

<sup>48</sup> Xhidajłreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlazj narä.

<sup>49</sup> Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

<sup>50</sup> Sas rołca xhablazjni gudixhni, huisuliini, biäädtni lo Jesús.

<sup>51</sup> Dxejc räjp Jesús lojni:

—Naja', ¿xhini'c rlazzlu gunä?

Dxejc räjp lotiä'pga loj Jesús:

—Dad, rlazä gunlu fiä.

<sup>52</sup> Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajltini Jesús lo nejz.

## 11

*Biu' Jesús Jerusalén*

(Mt. 21:1-11; Lc. 19:28-40; Jn. 12:12-19)

<sup>1</sup> Cheni sadzujñreni gajxh Jerusalén, gudejdreni neñ reguedx Betfagé nájza neñ guedx Betania nez cuä' dajne' ni laa dan Oliib. Baxhañ Jesús tiop xpejn pacni,

<sup>2</sup> räjpni lojreni:

—Colchäj guedxe' ni ria'n nez lojtu. Che guidzujntu ro' guejdxga, sidxäلتu te bure' ni caduu. Gajd bejn cuibni. Colxhečni, coltanägajcni.

<sup>3</sup> Palga yu' chu naa lojtu: “¿Xhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

<sup>4</sup> Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhecrenini.

<sup>5</sup> Gaii bejn ni tre' ro'c räjp lojreni:

—¿Xhicuent caguxhectuni?

<sup>6</sup> Dxejc räjpreni loj rebejn ga si'cni räjp Jesús lojreni gäbreni. Basangajc rebejn ga sanäreni bure'ga.

<sup>7</sup> Dxejcru biädnäreni bure'ga loj Jesús. Badzubahreni xhablajzreni dejtz bure'ga. Gubijbti Jesús bure'ga.

<sup>8</sup> Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

9 Rebejn ni nijd lojni näj reni sanajl dejtzniguredxa'reni, räjpreni:

—¡Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni.

10 Coldeed xquixhtiooz loj Dios sa'csi agubiré xcälrnibee toxtadnu David. ¡Colguiliä'p xpala'n Dios ni yu' jiaro!

11 Dxejcti biu' Jesús neñ guedx Jerusalén. Biu'zani neñ guidoro. Che bahuii Jesús guira'ti ni cayajc neñga, sanäni guitzubitio'p xpejnꝑacni, sääreni Betania sa'csi agudxej.

*Batzubde Jesús yejc te yagiigw ni xhet cajdi lojni (Mt. 21:18-19)*

12 Che bara yääl, biunejzreni Betania. Dxejcti gusloj calaan Jesús,

13 bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc.

14 Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas. Biejnza diajg rexpejnꝑacni.

*Gulää Jesús renani ruto' näj renani rsii neñ guidoo*

*(Mt. 21:12-17; Lc. 19:45-48; Jn. 2:13-22)*

15 Dxejcti bidzujnreni guedx Jerusalén. Biu' Jesús neñ guidoro. Gusloj cabääni renani ruto' näj renani rsii neñ guidoo. Niluxh batiejxhni rexmex renani ruchaa meel, näjza reyagxhil xten renani ruto' paloom.

16 Diruni nusaan nidednäjreni xhicos nez neñ guidoo.

17 Dxejc caguluiinireni, räpgajcni lojreni:

—¿La et screedi caj loj guijtʒ? “Xyu'ä sirilaj yu' cadre rrinab guiraa rebenguedxliuj lo Dios.” La'tu abejntuni si'c xpiliää gubaan.

18 Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxeloj rextidx Jesús.

19 Che biu' guxhijn, birii Jesús guejdxga.

*Gubijdz yagiigw ni bidzubde*  
(Mt. 21:20-22)

20 Che bara yääl gudejdreni, bahuiireni agubijdz guideb yagiigw, näj rexlobaani.

21 Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcn, agubijdzni.

22 Dxejcti gunii Jesús räjpni lojni:

—Colchalilajz Dios.

23 Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini.

24 Ni'cni rniä lojtu, xhitis nani guiniabtu lo Dios che rrinäjtuni, colchalilajz xca'tuni, dxejc sica'tuni.

25 Luxh che guiniabtu Dios, palga yu' chu loj rdxechlajztu, colsiäjla lajztu, te näjza Xtadtu nani yu' xhaguibaa gusiäjla rextojltu.

26 Palga ditu gusiäjla lajztu con resa'tu, diza Xtadtu nani yu' xhaguibaa gusiäjla lajzni rextojltu.

*Yälrnibee xten Jesús*  
(Mt. 21:23-27; Lc. 20:1-8)



<sup>27</sup> Sas bidzunsacreni guedx Jerusalén. La<sub>l</sub> ni sasaj Jesús ne<sub>n</sub> guidoro, rebixhojz nani rnibee, nájza rebej<sub>n</sub> ni ruluii leii, nájza reguxhtis gubig lojni.

<sup>28</sup> Rájpreni lojni:

—¿Xhi yäl<sub>r</sub>nibee rajplu, ni'c rujnlu redzuunre?  
¿Chu baniidx yäl<sub>r</sub>nibee rujnlu redzuunre?

<sup>29</sup> Dxejc rájp Jesús lojreni:

—Guiniabdidxäza lojtu. Coł<sub>t</sub>zu'ni loä, dxejcti guiniäza xhi yäl<sub>r</sub>nibeere rapä ni'c runä redzuunre.

<sup>30</sup> ¿Chu baxha<sub>l</sub> Juan ni batiobnis? ¿La Dios o la rebej<sub>n</sub>? Col<sub>n</sub>ii loä naj.

<sup>31</sup> Dxejcti gunii loj sa'reni, rájpreni:

—Palga jie'tznu “Dios”, naani “¿xhicuent ditu nililajz xtiidxni?”

<sup>32</sup> Diza niacti niäjbreni “rebej<sub>n</sub>” sa'csi rdxejbreni rebenxhidaal, sa'csi guiraa rebej<sub>n</sub> huililajz Juan gujc te bej<sub>n</sub> ni guniipac xtidx Dios.

<sup>33</sup> Dxejcti guniireni, rájpreni loj Jesús:

—Dinu guidon.

Sas rájp Jesús lojreni:

—Dizana guiniä xhi yäl<sub>r</sub>nibeere rapä runä redzuunre.

## 12

*Te xcuent rebenguijdx ni rbäzlaa  
(Mt. 21:33-46; Lc. 20:9-19)*

<sup>1</sup> Dxejcti gusloj caguseed Jesús rebej<sub>n</sub> con re-cuent ni ruluii, rájpreni:

—Yu' te bej<sub>n</sub> bazuj yaguub loj xyujni, bejnzani bazaani, dxejcru gudäänni te lajt cadre jiä't uubga. Dxejcti bejn<sub>n</sub>i te yu' jiaa, te ro'c cue nani ga'p lo xyujni.

'Badedlaatinini loj gaii bej<sub>n</sub>, sä'tini zijt.

2 Che bidzujñ xpäii uub, baxhal baxhwaan uubga te xmosni loj rebejn ni rbäzlaa ro'c, te xca'ni uub nani riäjñ xca' bejnğa.

3 Dxejc rebejn ni rbäzlaa ro'c gunaazreni mosga, gudijnrenini, luxh bazejcrenini siini ganaxni.

4 Dxejcru baxhal baxhuaanga stee mos lojreni. Niluxh laareni bacuaareni guijni, gudilguijdxreni yejc mosga, xho rniajni gubi'ni.

5 Dxejc baxhal bejnğa stee mos, dxejc bagu'trenini. Baxhalni xhidajlrureni. Gaii gudilguijdxreni, sgaiini bagu'treni.

6 'Yu'za tejtis xi'nni, luxh sanälajznini. Por lult näjza xi'nni baxhalni, naani: "Siucareni xi'nä."

7 Dxejc rebejn nani rbäzlaa ro'c räjp loj sa'reni: "Dee najc laa ni jiannäj ree. Coltaa, guigu'tnuni, te xca'nu yujre."

8 Sas gunaazrenini, bagu'trenini. Guläätirenini lo yujga.

9 '¿Xhicha gun baxhwaan yaguubga rebejnre? Siädni luxh sugu'tni rebejnre, dxejcti gudeedni yujga loj ste'ca bejn.

10 '¿La gajdtu gol guijtzi ni rnii scree? Guij nani guläcaj renani runchee yu', ni'c agujc mastr ni guzuj galoo.

11 Dad xtenu bejn scree, cos sacduxhni nezlojnu.

12 Dxejc rlajz reguxhtis nani bacuadiajg cuentre niniaaz Jesús, sa'csi gucheereni laareni cacuaa Jesús diidxre. Sa'csi bidxejbreni rebenxhidaal, ni'c basa'nrenini, sä'tireni.

*Düidxxcuentreimpuest  
(Mt. 22:15-22; Lc. 20:20-26)*

13 Dxejcti baxhalreni gaa*i* xpej*ŋ* refarisee n*ä*z*a* gaa*i* xpej*ŋ* Herodes loj Jesús te gula'tzreni don xho gac guiniaazreni Jesús.

14 Dxejcti biäädreni, räjpreni lojni:

—Dad, nadonnu luj najclu te bej*ŋ* ni rnili*i*. Par luj guiraasi bej*ŋ* sajc tebloj, sa'csi dilu fii la sajc bej*ŋ* o la xhet sajc*d*i bej*ŋ*. Luj ruluiipaclu xhini'c rlajz Dios gun bej*ŋ*. ¿La laaca quii*x* bej*ŋ* reimpuest lo x*c*ubieer César o la xhet laadi? ¿La guidiixnu o la dinu guidiix?

15 Dxejcti laani gucbegajcni rujnsireni si'cni rni-abdiidxreni. Räjpni lojreni:

—¿Xhicuent runn*ä*jt*u* narä scree? Coltanä te meelga loä, te fiä lojni.

16 Badeedtireni te meel lojni, dxejc räjpni lojreni:

—¿Chu yej*c* caj lojni, chu laj caj lojni?

Dxejc räjpreni:

—Xten César.

17 Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebej*ŋ*ga con xtiidxni.

*Yälrniabdiid*x* xcuent yälrbansacni lo rebe*ŋ*gut  
(Mt. 22:23-33; Lc. 20:27-40)*

18 Sas biädhuii resaducee loj Jesús. Resaducee najc rebej*ŋ* nani rnii di rebe*ŋ*gut guiba*ŋ*sac. Dxejc gunabdiidxreni lojni, räjpreni:

19 —Dad, xleii Moisés ruluii loonu, palga guet te niguii luxh gusa'nni chääl*n*i ruti xi'nni, nanabpac xca' bej*t*zni chääl*n*i, te chu xi'nni con laani lacua niu' xi'n tobej*t*zni.

20 Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni.

21 Dxejcti cua' ni rojpga gunaaga. Che gujtni, rut gajcdi xi'nni. Si'cza gusajc ni riojnga.

22 Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtz gunaaga.

23 Guigajdzreni guläznäjreni gunaare. Cheni guibaṅsacreni lo rebeṅgut, ¿chu chäälgacni?

24 Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijtz, dizatu gumbee yälṛnibee xten Dios.

25 Che guibaṅsacreni loj rebeṅgut, direni guchṅaa, ruta gudeedtireni te guchṅaareni. Niluxh sajcreni si'c najc rexangl Dios nani yu' xhaguibaa.

26 Palga canabdiidxtu la rbaṅsac rebeṅgut, ¿la di lajztu guisaj biltu guijtz ni bacuaa Moisés? Moisés bacuaa nani gunii Dios lojni nen bajl, räjpni: “Narä nacä Xtios Abraham, Xtios Isaac, Xtios Jacob.”

27 Palga Dios najc Xtios rebejṅre, direni gac beṅgut, nabaṅnäjreni Dios. Et laadi najc xhigabtu.

### *Yälṛnibee ni sajcru*

*(Mt. 22:34-40)*

28 Dxejcru bidzujṅ tej rebejṅ ni najn leii, biejn diajgni xhi caniireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcru lo guiraareni?

29 Dxejc räjp Jesús lojni:

—Mandamient nani sajcru loj guiraareni najc dee: “Bacuadiajg luj, guejdx xten Israel, Dad Xtiosnu, Dad tejtis najcni.

<sup>30</sup> Chanälajzlu Dad Xtioslu guideb lastoolu, näj xaimlu, näj guideb xcäriejnlu, näjza guideb xcäl<sub>n</sub>adiplajzlu.”

<sup>31</sup> Sigajcza najc mandamient ni rojpga: “Huinälajz sabejnlu si'ctis sanälajzlu lagajc luj.” Redee najc remandamient nani sajcru loj guiraareni.

<sup>32</sup> Dxejcti räjp bejn<sub>n</sub>ga ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani.

<sup>33</sup> Luxh sacduxh chanälajz bejn<sub>n</sub> Dios guideb lastooni, näj xcäriejn<sub>n</sub>i, näjza xaimni, näj guideb xcäl<sub>n</sub>adiplajz<sub>n</sub>i, luxh chanälajz<sub>n</sub>i resabejn<sub>n</sub>i sigajc laani. Redee sajcru loj ni rujn bejn<sub>n</sub> che rudeedreni gojn lo Dios.

<sup>34</sup> Che bahuii Jesús laaca guniini, räjpni lojni:

—Guxii cayäädx te jiu'lu loj xcäl<sub>n</sub>ribee Dios.

Sas rutru biajxhdi gunabdiidx loj Jesús.

### *Chu xi'n najc Crist*

*(Mt. 22:41-46; Lc. 20:41-44)*

<sup>35</sup> Che caguseed Jesús nejn<sub>n</sub> guidoro, räjpni:

—¿Xho mood rnii rebejn<sub>n</sub> ni najn leii Crist najc xi'n David?

<sup>36</sup> Sprit D<sub>x</sub>an xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

37 Palga lagajc David räjp: “Dad, xtenä”, che guni-  
ini xcuent Crist, ¿xhoxh najc Crist xi'n David?

Rebeñxhidaal nani yu' guejdxga bacuadi-  
agsa'creni xtiidxni.

*Gule'c Jesús xquej remastr xten leii*  
(Mt. 23:1-36; Lc. 11:37-54; 20:45-47)

38 Lañi caguseedni rebejn, räjpni lojreni:

—Col̄susiñ, na'c gu'chtu loj rebejn ni ruluii  
leii. Laareni rlajz sanäj reladsiool xtenreni.  
Rdxaglajzreni rniñ bejn lojreni nez lo reguii.

39 Rlajzarenì cuerenì cadro rbej renani sajcru  
neñ reguidoo näjza cadro ru' relanij.

40 Rudzucajzarenì xhixten rebiuud, rniizarenì  
xhidalduxh diidx che rol̄renì le', te rusäuurenì loj  
rebejn. Castigwroru gac redee.

*Gojn xten te biud prob*  
(Lc. 21:1-4)

41 Dxejcti gurej Jesús cuä' caj cadro rusäl bejn  
gojn. Cahuiini cagusäl rebejn meel neñ cajga.  
Xhidajl reni rajp cagusäl xhidajl meel nenga.

42 Che biäd te biud prob, basäl̄ni tiop melbäz  
ni sajc si'cti tej centaab.

43 Dxejcru gurejdx Jesús rexpejn̄pacni, räjpni lo-  
jreni:

—Rniliäpac lojtu, biud proobre basäl̄ xhidajlru  
lo guiraa renani basäl̄ neñ cajre,

44 sa'csi guiraarenì abasäl̄ che'nsi xhixtenreni.  
Luxh gunaare basäl̄ guiraa nani rajpni. Ni'ctis  
najc nani gaunäjni.

# 13

## *Gunii Jesús sibijl guidoo*

(Mt. 24:1-2; Lc. 21:5-6)

<sup>1</sup> Cheni sariireni nen guidoro, räjp tej rex-pejnpacni lojni:

—Dad, bahuii lacti reguij, lacti reyu'.

<sup>2</sup> Dxejcti räjp Jesús lojni:

—¿La rhuuilu loj reyu're? Nicla tej guij dijia'n dzuub yejc sa'ni, guiraliireni sire'ch.

## *Recos ni gac che ameer nitloj guedxliuj*

(Mt. 24:3-28; Lc. 21:7-24; 17:22-24)

<sup>3</sup> Dxejc sobga' Jesús yejc dajne' ni laa dan Oliib, cahuiini nez ro' guidooga. Che sugaxhtebreni, gunabdiidx Pedr näj Jacob näjza Juan näjza Andrés lojni, räjpreni:

<sup>4</sup> —Gunii loonu, ¿guc gac dee? ¿Xhi guihuiinu te gacbeenu asiäddzũgajxh soob guiraa rediidxre?

<sup>5</sup> Dxejcti gusloj gunii Jesús lojreni, räjpni:

—Colhuii, te rut gusguedi la'tu,

<sup>6</sup> sa'csi xhidalduxh bejn jiäd con laä, gäbreni: “Narä nacä Crist”, luxh rniisireni si'c, susguezareni xhidajl bejn.

<sup>7</sup> Che jiejn diajgtu yu' guer näj yälñadxeeb xten guer, na'c guidxejbtu. Nanabpac gacni; et dxejcti nitloj guedxliuj.

<sup>8</sup> Säjs naciõn yejc sanacionni, näj yälñibee yejc sayälñibeeni. Xhidajl lajt sajc xu, siliaanza bejn, luxh säjs rebejn yejc sa'ni. Redee najc ni guisloj guidxejb, gachuinza lajzni.

<sup>9</sup> 'Dxejc la'tu colsusin sa'csi suteedreni la'tu ladzñaa reguxhtis, siguijnzareni la'tu nen

reguidoo. Sacrejdxtu lo regubieer näjza loj re<sub>re</sub>ei xca<sub>l</sub>nasa'c narä, te si'c gac guiniitu xtidxä lojreni.

<sup>10</sup> Nanabpac guirechxgaa xtidx Dios loj guiraa rebe<sub>n</sub> guedxliuj.

<sup>11</sup> Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Col<sub>n</sub>ii nani jäjttis yejctu dxejc, sa'csi xhet la'ditu ni guinii, Sprit D<sub>x</sub>an xten Dios ni guinii.

<sup>12</sup> Luxh suto' bej<sub>n</sub> lagajc bejtzni te guet bejtzni. Suto'za dad lagajc xi'nni. Säjs rebiuux yejc rex-cusajnni te guet reguzajnga.

<sup>13</sup> Sidxechlajz guiraa rebej<sub>n</sub> lojtu sa'csi najctu xpe<sub>nä</sub>; nani ted guiraa retrabajwre, ni'c gudeed Dios xca<sub>l</sub>nabaj<sub>n</sub>ni.

<sup>14</sup> 'Che fiitu loj nani najc yäl<sub>r</sub>dxechlajz, nani najc yäl<sub>r</sub>unitloj, nani gunii Daniel ni gunii xtidx Dios. Che fiitu nani suga' cadro di nunyäj<sub>l</sub> suuni, dxejcti suguxu<sub>n</sub> renani yu' nez Judea chääreni nez ne<sub>n</sub> redaj<sub>n</sub>. (Nani go<sub>l</sub> gui<sub>j</sub>tzre sugacbeenini.)

<sup>15</sup> Bej<sub>n</sub> nani suga' yejc yu' na'c jäj<sub>t</sub>ni jiu'ni ne<sub>n</sub> te yu' xca'ni gaii xhixtenni.

<sup>16</sup> Nani yu' loj n<sub>i</sub>aa, di ga<sub>l</sub> jäj<sub>t</sub> te xca'ni xhabla-jz<sub>n</sub>i.

<sup>17</sup> ¡Aii! Xhiza nalas chu regunaa ni nuu bäs, luxh renani rusiä' xi'nni, ne<sub>n</sub> redxejga.

<sup>18</sup> Col<sub>n</sub>ab loj Dios na'c sactu scree ne<sub>n</sub> rebäinaj<sub>l</sub>.

<sup>19</sup> Ne<sub>n</sub> redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni.

<sup>20</sup> Paru di Dad gusia'tz redxejga, nicla tej bej<sub>n</sub> di laa. Susia'tz<sub>n</sub>i redxejga sa'csi sanälajz<sub>n</sub>i rexpej<sub>n</sub>ni nani aguleni.



21 'Dxejc palga yu' chu naa lojtu: “Col<sub>h</sub>uii, aree Crist”, o “Col<sub>h</sub>uiire, ani suga' rec”, na'c chalilajztuni.

22 Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueereni, te palga sajcn, rlanjreni gusgueelireni renani agule Dios.

23 Ni'cni la'tu col<sub>s</sub>usiñ; agunixgaä lojtu guira'ti ni gac.

*Xho gac che jiääd Xi'n Dios ni gujc Niguii  
(Mt. 24:29-35, 42-44; Lc. 21:25-36)*

24 'Neñ redxejga, cheni luux retrabajwduxhga, sicäy lo gubijdx, luxh diru bäi gusanij.

25 Sitejb rebal<sub>x</sub>haguibaa, sinibsejs recos nani nasnä j rebal<sub>x</sub>haguibaa.

26 Dxejcti suhuii rebejn loä, Xi'n Dios nani gujc Niguii, siälä neñ reza guideb yä<sub>r</sub>ni beduxh xtenä, näjza xcä<sub>d</sub>imbicha'ä.

27 Dxejcti guxhal<sub>g</sub>acä rexanglä jiädtojpreni renani guleä guideb lo guedxliuj, cat nalooli guedxliuj näjza cadro nalooli guibaa.

28 'Col<sub>g</sub>uisieed nani rului yagiigw. Cheni rii rebäte' lojni luxh che rcaj balaj lojni, acaxhna-jntu bäi gusguij asadzun<sub>g</sub>ajxh.

29 Sigajcza, che fiitu acayajc recosre, sacbeetu asiädgaxhä, ameer guidzunä.

30 Rniliäpac lojtu, rebejn ni nabajn dxejc, direni nitloj, fixgaareni gac recosga.

31 Sinitloj guibaa näjza guedxliuj, rextidxä di nitloj.

<sup>32</sup> 'Naj, rut najndi guc gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

<sup>33</sup> Colhuid, colsusin, colnab loj Dios, sa'csi ditu gan guc guidzujn redxejga.

<sup>34</sup> Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canäj rolä'.

<sup>35</sup> Si'cza colsusin, sa'csi ditu gan guc jiääd baxhuan yu'ga, la jiäädni gudxej, o la jiäädni garol yääl, o la cäjy, o la jiäädni rsil.

<sup>36</sup> Colsusin, te di guiga'tu nagayejstu che guidzujni.

<sup>37</sup> Rediidx nani rniä lojtu, loj guiraa rebejn rniäni: colsusin.

## 14

### *Ruchaagreni diidx te guiniaazreni Jesús (Mt. 26:1-5; Lc. 22:1-2; Jn. 11:45-53)*

<sup>1</sup> Riäädx tiop dxej guidzujn lanij, dxej ni ruzaa lajzreni gulaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexpejn Israel näj rebejn ni ruluid leii rlajzreni niniaazreni Jesús con yälrusguee, te nugu'trenini.

<sup>2</sup> Dxejcti räjpreni lo sa'reni:

—Na'c jiennu scree neñ redxelanij, te na'c gun beñguejdx biejy.

### *Te gunaa ni basäl se't yejc Jesús Betania (Mt. 26:6-13; Jn. 12:1-8)*

<sup>3</sup> Yu' Jesús Betania, rolijz Simón, nani guyu' guejch ni ral tiejxhni. Che sobga'ni lo mex,

biääd te gunaa ca' te bo'tguij yu' setnard nenni. Rlianexhduxhni, sacduxhni. Dxejc gudi'chni yejn bo'tguijga, te basälni se'tga yejc Jesús.

<sup>4</sup> Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga?

<sup>5</sup> Paru nido' se'tga, nijni si'cti choñ gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

<sup>6</sup> Dxejc räjp Jesús lojreni:

—Colsaanni, ¿xhicuent rudxoju tu nani cayujn gunaare? Cos sacduxh dee bennäjni narä.

<sup>7</sup> Guideb ni guibajntu, su' rebejn nani xhet rajpdi lojtu, luxh che rlanjtu saj cagnäjtureni. Narä et xchejdi chu'ä lojtu.

<sup>8</sup> Gunaare abejnni nani gujctis bejn. Abaslanexhxgaani tiexhä, te chää tiexhä nen baa.

<sup>9</sup> Rniliäpac lojtu, cadrotis guidzujn xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

### *Rlanj Judas guto' Jesús*

*(Mt. 26:14-16; Lc. 22:3-6)*

<sup>10</sup> Dxejcti huij Judas Iscariot, nani najc tej retzubitio'p xpejnpac Jesús, loj rebixhojz nani rnibee te guto'ni Jesús lojreni.

<sup>11</sup> Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguuil Judas xho guto'ni Jesús.

### *Gudauxchej Dad con rexpejnpacni*

*(Mt. 26:17-29; Lc. 22:7-23; Jn. 13:21-30; 1Co. 11:23-26)*

12 Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladznaa reEgipto. Räjp rexpejn̄pacni loj Jesús:

—¿Caro r̄lajzlu chosucheenu te gauulu nadxej, dxelanij?

13 Dxejc baxhālni tiop rexpejn̄pacni, räjpni lojreni:

—Cōlchäj neñ guejdx, ro'c guidxaagtu te niguii ni nuu te re' nis. Cōlchanajl niguiiga.

14 Cadro jiu'ni cōlye'tz loj bejn̄ ni najc rolijzni ro'c: “Naj Dad mastr, ¿con yu' cadro ria'n rebiooz, cadro gaunäjni rexpejn̄pacni nadxej, dxelanij?”

15 Dxejcti guluiini lojtu te yu' ni sojb jiaaliga yejc sa'ni, ni asuchexгаа neñni. Cōlyujn xhi guidaunu ro'c.

16 Sas huij rexpejn̄pacni, bidzujn̄reni neñ guejdxga. Bidxälreni te yu' si'cni räjp Jesús lojreni. Ro'c bejnreni xhi gudajwreni dxelanij.

17 Che huääz gubijdx, bidzunnäj Jesús guitzubitio'p xpejn̄pacni.

18 Lālni sobga'reni lo mex cayajwreni, räjp Jesús lojreni:

—Rniliäpac lojtu, tej la'tu ni cayaunää, suto'ni narä.

19 Dxejcti gusloj cayac-huin lajzreni, räjp tebgajreni lo Jesús:

—¿La naräni?

Räpgajc steeni:

—¿La naräni?

20 Dxejcti guniini, räjpni lojreni:

—La tej retzubitio'p, tej ni cayajw loj xpla'tä.

21 Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

22 Lałni cayajwreni, cua' Jesús yätxtiil, badeedzani xquixhtiooz loj Dios dxejc guła'nini, badeednini lojreni. Dxejcti räjpni:

—Cołca' yätxtiilre. Dee najc si'c tiexhä.

23 Cuagajcni te bas. Che abadeedni xquixhtiooz loj Dios, badeednini lojreni, gu' guiraareni nen basga.

24 Dxejcti räjp Jesús lojreni:

—Dee najc si'c xtienä ni ruluui diidx ni biä'nnu, nani guixe' xcuent xhidajl rebejn.

25 Rniliäpac lojtu, diruna yä'ä bin nani rii yejc uub, dxejli yä'äni stehuält loj xcälrnibee Dios.

*Gunii Jesús sinii Pedr dini gumbeeni*

*(Mt. 26:30-35; Lc. 22:31-34; Jn. 13:36-38)*

26 Che gulujx bilreni te dij xten Dios, biriireni, sääreni nez dajne' ni laa dan Oliib.

27 Dxejcru räjp Jesús lojreni:

—Guiraatu sibälaztu narä naguxhijn, sa'csi si'c cajni lo guijtz: “Sugu'tä baxhtoor luxh suxun rexiiil.”

28 Che guibaṅsacä loj rebeṅgut, ganidä cha'a Galilee, dxejcti jiäädту.

29 Dxejc räjp Pedr loj Jesús:

—Palga guiraareni cuälazlu, narä dina cuälazälu.

30 Dxejc räjp Jesús lojni:

—Rniliäpac lojlu, lagajc guxhijnre, nicla gajd guidgäi cuedxa' tiop huält, luj aguiniilu chon huält dilu gumbee narä.

31 Luxh laani sanuutis xtiidxni, räjpni:

—Cadro guetlu setäza, dina guiniä dina gum-beälu.

Luxh guiraa rexpejn̄pacni gunii si'c.

*Gunab Jesús loj Dios che yu'ni Getsemaní*

*(Mt. 26:36-46; Lc. 22:39-46)*

<sup>32</sup> Dxejcti bidzujn̄reni te lajt cadro laa Getsemaní. Dxejc räjpni loj rexpejn̄pacni:

—Cołcuj ree lałni chanabä lo Dios.

<sup>33</sup> Dxejcru sanäni Pedr näj Jacoob näjza Juan. Dxejc gusloj cayac-huinduxh lajzni, luxh cayu'ni yälrsiaduxh.

<sup>34</sup> Dxejc räjpni lojreni:

—Cayac-huinduxh lazä, an sugu'tni narä. Cołjia'n ree, cołtie'ch bacal̄.

<sup>35</sup> Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc.

<sup>36</sup> Räjpni:

—Abba, xtaä, luj rajc rujnlu guira'ti: badzucaj retrabajwre loä. Xhet si'cni rlazädi narä, bejn si'cni rlajzlu luj.

<sup>37</sup> Dxejc biäädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' dianiajcdi nutie'chlu bacal̄?

<sup>38</sup> Cołtie'ch bacal̄, colnab lo Dios, te na'c guntu dojl. Lastootu rlajz gutie'chtu bacal̄, luxh tiejxhtu abadxajg.

<sup>39</sup> Huij Jesús stehuält, binabni loj Dios, guniini lagajc rediidx ni guniini galoo.

<sup>40</sup> Dxejcti biädsacni cadro tre'reni, gunazsacnirenireni nagayejsrenireni, sa'csi yuduxh bacal lojrenireni. Luxh direni nidxäl xhi niniireni lojni.

<sup>41</sup> Ni riojn huält biädni, dxejc räjpni lojrenireni:

—Agojl colguejs, colsilajz, agujc, abidzujn or ni ted Xi'n Dios ni gujc Niguui ladznaa rebeñdojl.

<sup>42</sup> Colchastie, colcho'. Asiäddzungajxh ni guto' narä.

### *Gunaazrenireni Jesús*

*(Mt. 26:47-56; Lc. 22:47-53; Jn. 18:2-11)*

<sup>43</sup> Canisijcni scree, che bidzujn Judas, ni najc te retzubitio'p xpejn pacni, siädni xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni ruluii leii, näjza rebeñgool nani najc guxhtis.

<sup>44</sup> Niluxh nani ruto' Jesús abadeedni te seen lojrenireni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

<sup>45</sup> Che bidzujn Judas, gubigni loj Jesús, räjpni lojni:

—Dad, Dad.

Sas bachagro'nini.

<sup>46</sup> Dxejcru gunaazrenireni Jesús ro'c.

<sup>47</sup> Dxejc tej renireni suga' ro'c, gulää xspaadni, gudilguijdxni xmos bixhojz nani sajcrui, batiu'ni diajgni.

<sup>48</sup> Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan?

49 Guiraa dxej guyu'ä lojtu neñ guidoo, caguiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

50 Dxejcru rexpejn̄pacni gulälazrenini, baxuñtireni.

### *Bi'n nani baxun*

51 Sanajlza te bi'n Jesús, nadejbni ganaxhtis te bariaad. Si'c gunaazrenini.

52 Dxejcti baxuñni, libasa'nni bariaadga, sä'tini xhabääl̄ni.

### *Suga' Jesús loj reguxhtis*

(Mt. 26:57-68; Lc. 22:54-55, 63-71; Jn. 18:12-14, 19-24)

53 Dxejc biäd̄näreni Jesús loj bixhojz ni sajcr̄u. Bidojpb̄ rebixhojz nani rnibee, näj rebengool ni najc guxhtis, näjza rebejn̄ ni ruluii leīi.

54 Luxh Pedr̄ z̄ijt̄ z̄ijt̄ sanajl̄ni Jesús. Che bidzujnt̄ini lo xle' bixhojz ni sajcr̄u, gurenäj̄ni rebejn̄ nani rajp̄ ro'c, cagucha' lajz̄ni lo bajl̄.

55 Rebixhojz nani rnibee, näjza guiraa rebengool ni najc guxhtis, caguil̄reni xhi tej xquej Jesús nidxäl̄reni, te nugu'treni Jesús, xhet bidxäldireni.

56 Xhidajl̄ bejn̄ gunii didxxhii, räjp̄reni et laadi rujn̄ Jesús, niluxh di xtiidxreni nile', sa'csi garen garen guniireni.

57 Dxejc huisulii gaīi bejn̄ ni guniireni stee didxxhii xcuent̄ Jesús, räjp̄reni:

58 —Nuunu biejn̄ diaagnu guniini: “Sutiexhä xyu' Dios ni guc-chee con ñaa rebejn̄, luxh chont̄is dxej guncheä steeni, ni nac-chee et con ñaadi rebejn̄.”



59 Nicla si'c di xtiidxreni nile', sa'csi garen garenza guniireni.

60 Dxejcti huisulii bixhojz ni sajcru galäii guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

61 Laani niäuuutis ro'ni, xhet guniidini. Dxejcti gunabdidxsac bixhojz ni sajcru lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

62 Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza nen reza ni tre' xhaguibaa.

63 Dxejcru bixhojz ni sajcruga, batiäjsni tla' xhabni, räjpni:

—¿Xhi jienrunu guidiilnu diidx xcuentni?

64 Abiejn diajgtu xho guniyajni Dios. Naja', ¿xhi najtu?

Dxejcti guiraareni räjp nungäjpac guetni.

65 Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

*Gunii Pedr dini gumbee Jesús*

*(Mt. 26:69-75; Lc. 22:56-62; Jn. 18:15-18, 25-29)*

66 Dxejc suga' Pedr lo yuj, nez lo le'ga, che biääd te xcriaad bixhojz ni sajcru.

67 Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siääd Nazare't.

68 Dxejc Pedr basgueeni, räjpni:

—Dina gumbeäni. Dizana ganä xhini'c caniilu.  
Dxejcti biriini sääni ro' suaan. Dxejcti guredxa' guidgäi.

<sup>69</sup> Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

<sup>70</sup> Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi ben Galileelu, luxh guyasi riejn rniilu si'c rnii reben Galilee.

<sup>71</sup> Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

<sup>72</sup> Dxejcti barojp huält guredxa' guidgäi. Dxejc banalajz Pedr nani räjp Jesús lojni: “Che gajdli guidgäi cuedxa' tiop huält, luj gacla choñ huält aräjplu dilu gumbee narä.”

Dxejc guslojni cayoonna.

## 15

### *Suga' Jesús loj Pila't*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Che bara yääl bidxaag sa' rebixhojz ni rnibee, näj rebenḡool ni najc guxhtis, näjza rebejn ni ruii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't.

<sup>2</sup> Dxejc gunabdiidx Pila't loj Jesús räjpni:

—¿La luj ni najc rei xten rexpejn Israel, ä?

Räjp Jesús lojni:

—Si'cni guniilu, si'c najcni.

<sup>3</sup> Dxejc gusloj rebixhojz nani rnibee cabe'c rexquej Jesús.

<sup>4</sup> Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

<sup>5</sup> Bidxeloj Pila't sa'csi nicla si'c xhetru guniidi Jesús.

*Gunibeereni guet Jesús*

*(Mt. 27:15-31; Lc. 23:13-25; Jn. 18:38-19:16)*

<sup>6</sup> Dxelanijpac ruslaa Pila't tej rebejn ni yu' latzguiib. Ruslaani chutis te ni rniab rebejn.

<sup>7</sup> Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnäj gubieer.

<sup>8</sup> Dxejc bidojp xhidajl bejn loj Pila't, gunabreni lojni gunni si'ctis rujnni casob lanij.

<sup>9</sup> Dxejc gunabdiidx Pila't lojreni, räjpni:

—¿La rlajztu guslaá reii xten rexpejn Israel, ä?

<sup>10</sup> Sa'csi gucbegajcni rdxechlajz rebixhojz loj Jesús, ni'c bateedrenini lojni.

<sup>11</sup> Ni'cni baquiilza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

<sup>12</sup> Dxejc räjp Pila't lojreni stehuält:

—¿Xhini'c rlajztu gunnä nani rniitu reii xten rexpejn Israel?

<sup>13</sup> Dxejcru guredxa'reni:

—¡Bacuaani lo cruzj!

<sup>14</sup> Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¡Bacuaani lo cruzj!

15 Baslaati Pila't Barrabás, sa'csi rlajzni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruzj.

16 Dxejc huinä rexsoldaadni Jesús nen Pre-toor, yu' cadro rujnreni yäl\_guxhtis, ro'c batojpreni guiraa resa'reni.

17 Dxejcti bashuajcwreni Jesús te lad moraad, bencheereni te coron guejch basälreni yejcn.

18 Guslogajc caguxhi näjrenini, caniireni lojni:

— ¡Colguiliä'p xpala'n reii xten rexpejn Israel!

19 Batiäjlneni te yabixhijl yejcn, batiobxhejnreni lojni, luxh guzuxhijbreni te rajnrenini.

20 Che gulujx basacsíreni Jesús, gulääreni lad moraad ni najcwni, sas bashuajcwrenini xhajib-pacni. Gulägajczeni Jesús te cuaarenini lo cruzj.

*Bacuaareni Jesús loj cruzj*

(Mt. 27:32-44; Lc. 23:26-43; Jn. 19:17-27)

21 Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basgurenini xcruzj Jesús.

22 Dxejcti huinäreni Jesús cadro laa Gólgota, nani säloj: dan Calabeer.

23 Ro'c badeedreni lo Jesús bin nani nu'ch mir lojni, dxejc laani naaddini niä'ni binga.

24 Che gulujxti bacuaareni Jesús loj cruzj, gudzujtreni yejc rexhajbni, te don xhini'c xca' tejgareni.

25 Agujc choñ or gulejn gubijdx che bacuaareni Jesús lo cruzj.

26 Letreer cadro bacuaareni xtojlni scree bejnrenini: “Reii xten rexpejn Israel.”

27 Bacuaazareni lo stiop cruuz tiop gubaan, tejni xladbee Jesús, xtee xladbäjgwini.

28 Dxejc guzobj diidx ni caj loj guijtzi nani rni: “Loj rebenguidx bigabni.”

29 Luxh renani sadejd nejzga guniyajreni Jesús, cagusniibreni yejcreni, räjpreni lojni:

—jJaa! Luj nutiejxhlu guidoo luxh choñtis dxej niunchesacluni.

30 Naj baslaa lagajc luj, biäjt loj cruuzga.

31 Näjza rebixhojz ni rnibee, näj rebejn ni ruluii leii, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laani.

32 Naj sujiäjt Cristre, rei xten rexpejn Israel, lo cruuz te guihuiinu, te chalilaaznu.

Näj regubaan ni caj lo cruuz guniyajzareni Jesús.

### *Xcälgujt Jesús*

*(Mt. 27:45-56; Lc. 23:44-49; Jn. 19:28-30)*

33 Che gojl läidxej, bicäy si'cti choñ or.

34 Che gudejd choñ orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

35 Biejn diajg gaii bejn ni suga' ro'c räjpni si'c, dxejc räjpreni:

—Cołcuadiajg, Elías cabejdxni.

36 Sas baxun tejni, bahuajdxni te sponj loj binagr. Dxejcru basälhini yejc te yabixhijl, badeednini loj Jesús te yänini, räbgajcni:

—Cołgusaan guihuiinu don la siädläjd Elíasni loj cruuz.

37 Dxejcru guredxaduxh Jesús, gujttini.

38 Dxejc lajd ni najl neñ guidoro biräjsni, gujčni tiop la', jiaali lo yujli.

39 Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

40 Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee.

41 Che guyu' Jesús Galilee birinajl regunaare Jesús, luxh bahuiirenini. Yu'za xhidajlru regunaa ni biädnajl Jesús che biädni Jerusalén.

### *Biga'tz Jesús*

*(Mt. 27:57-61; Lc. 23:50-56; Jn. 19:38-42)*

42 Biu' gudxhijñ, luxh najcni dxe bispr che rusucheereni par sabd, dxej ni rusilajz rexpejñ Israel.

43 Biäd José ni siäd Arimatea, najcni te rebejñ ni sajc loj reguxhtis. Näjza laani cabäjzni xcälrnibee Dios. Guideb yälñabajñ gunabni tiexh Jesús lo Pila't.

44 Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús.

45 Che räjp capitánga lojni agujt Jesús, dxejc badeed Pila't tiexh Jesús loj José.

46 Agusii José te bariaad, luxh che gulätñ Jesús lo cruzj, batejbnini neñ bariaadga. Dxejc gudixhni Jesús neñ te biliää ni caj cuä' te guilaj, dxejcru batzugni te guiro ro' biliääga.

47 Bahuii Marii Magdalen, näj Marii xnan José cadre biga'tz Jesús.

# 16

## *Huäjz Jesús loj rebengut*

*(Mt. 28:1-10; Lc. 24:1-12; Jn. 20:1-10)*

<sup>1</sup> Che gudejd sabd, dxej ni rusilajz rexpejn Israël, Marii Magdalen näj Marii xnan Jacoob näjza Salomee gusii setnejxh te chatääbreni se'tga tiexh Jesús.

<sup>2</sup> Che biu' xmaan, rsildooru, che calejn gubijdx, biädreni ro' xpaani.

<sup>3</sup> Cayäjp loj sa'reni:

—¿Chu gudzucaj guiroga ro' xpaani te jiu'nu?

<sup>4</sup> Che gudixhlojreni, bahuiireni alagubicaaj gujga, luxh najcni te guiroduxh.

<sup>5</sup> Che biu'reni neñ biliääga, bahuiireni lo te bi'n sobga' ladbee neñ biliääga. Najcw bi'nga te ladnol ni najc siool. Dxejc bidxejb regunaaga.

<sup>6</sup> Dxejcti räjp bi'nga lojreni:

—Na'c guidxejbtu. Caguiltu Jesús ni siäd Nazare't, nani cuaj lo cruzj. Rutiruni ree. Agubajñni lo rebengut, coltahuii cadro gudixhreni tiejxhni.

<sup>7</sup> Colchäj, colchaye'tz lo rexpejñpacni, loj Pedr, ganidla Jesús guidzujñ Galilee, dxejcti guidzujñtu. Ro'c fiitu lojni, si'cni guniini lojtu.

<sup>8</sup> Biriitireni ro' biliääga, racejslireni sa'csi cadxejbreni. Rut lojdi guniidireni sa'csi cadebduxhreni.

## *Baluiloj Jesús loj Marii Magdalen*

*(Jn. 20:11-18)*

<sup>9</sup> Gubajñ Jesús loj rebengut rsildooru che biu' xmaan. Baluilojni galoo loj Marii Magdalen, nani agacgulääni gajdz beñdxab neñ lastooni.

<sup>10</sup> Dxejcti huij Marii Magdalen, huiye'tzni loj renani cuansanäj Jesús, renani cayac-huin lajzni, cayoonreni.

<sup>11</sup> Che biejn diajgreni ahuāzsac Jesús lo rebeṅgut, luxh Marii abahuii lojni, di lajzreni nilii.

*Baluiloj Jesús loj tiop xpejn pacni  
(Lc. 24:13-35)*

<sup>12</sup> Ste'ca najc Jesús baluilojni loj tio'p renani sasaj sääreni lo nejz.

<sup>13</sup> Dxejcti gubi'reni, huiye'tzreni loj sgaiga, luxh nicla xtidx reni'c di lajzreni nilii.

*Baxhal Jesús repost  
(Mt. 28:16-20; Lc. 24:36-49; Jn. 20:19-23)*

<sup>14</sup> Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebeṅgut.

<sup>15</sup> Rāj̄p Jesús lojreni:

—Colchāj̄ guideb lo guedxliuj, colnii xtidx Dios lo guiraa rebejn.

<sup>16</sup> Nani chalilajz luxh tiobnisni, siliaani loj dojl; biāda nani di lajzni chalii sinijt̄ni lo dojl.

<sup>17</sup> Niluxh remilagwre jiannāj̄ renani chalilajz: sibääreni beṅdxab xcuentā; siniireni ste'ca diidx;

<sup>18</sup> guiniaazreni bāl̄ con ṅaareni; masque yāreni xhicos ni rugu't bejn, xhet gacdireni; susujreni ṅaareni yejc rebenracxhuu luxh siajc rebenracxhuu.

*Huä'p Jesús xhaguibaa  
(Lc. 24:50-53)*



<sup>19</sup> Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee.

<sup>20</sup> Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnni milagwr te gucbee bejn laapac xtidx Dios ni caniireni. Sugacni si'c.

**Xtidxcoob Dios ni biädinä dad Jesucrist**  
**New Testament in Zapotec, Mitla (MX:zaw:Zapotec,**  
**Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

**Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

5cff1274-8dc3-5398-a94d-f6033bb363c9